

# Der Durchleuchtigst

und Durchleuchtigen hochgebornen Fürsten und Herren / Herrn Johans Friderichen Herzogen zu Sachsen / des Heiligen Römischen Reichs Erzmarschalch und Churfürsten / Landgrauen inn Döringen / Marggrauen zu Meissen / und Burggrauen zu Magdeburg. Und Herrn Philippfen / Landgrauen zu Hessen / Grauen zu Cagen Elbogen / zu Diez / Ziegenham und Hudda. Beständige und warhafftige / vorantwörtung / auch im Rechten gegründete widderlegung / Warumb die vormentzte versuchen derwegen Karl / so sich des namens den funfften / Römischen Kayser nennet / Ihre Chur und S. G. vor ungehorsame Chur und Fürsten / zu uorkleumen vnterstanden / In facto und inn der that nicht war / Sondern auff ire Chur und S. G. mit lauterem Vngrunde / erachtet / Das auch derselbe genante Kayser / ire Chur und S. G. ungefordert und ungehört / auch vnuberweist und vnerkand / als seiner Franckfordischen vorbriefften / versiegelten vn geschwornen Obligation / auch dem selbstbewilligten Landtfrieden / vnd allen natürlichen vnd beschriebenen Rechten öffentlich vnd Notorie zuwider / Freistiglich nicht hat in die Acht erklären / noch ire Chur und S. G. vor Lehrtiger erkennen mögen / Das auch dieselbe vormentzte Acht / nichtig vnd vnbindig / Vnd meniglich so sich derselben teilbar machen / do durch zu Recht strefflichen vnd Landttribruchtigen gewalt vnd freuel vben / vnd irer Chur und S. G.

G. vnterthanen / vnd Lehens vorwanten / die darauff irer Chur und S. G. abfellig zu werden sich vnterstanden / als doch derselben keiner so ehren vnd pfichtuorgessen sein wirdet / wider ire Eyde pflicht vnd ehre handeln / vnd solche alle sich inn die peen der Recht vnd des Landtfrieden vorwircken theten . .

✻ ✻

\*

D. M. XLVI.



Psalmo XXVI.

HERR ich lieb die Stete deines  
Hauses / vnd den ort / da dein Ehre  
wohnet.

NIM meine Seel nicht hin mit  
den Sundern / noch mein Leben mit  
den Blutdürstigen / welche mit bösen  
tücken omb gehen.



Esaiä XXXVII.

Nu aber HERR vnser Gott /  
hilff vns von Sennacheribs hand / dz  
alle Königreich auff Erden erfahren /  
das du HERR / den wir anruffen /  
warhafftiger Gott seiest .v.

XVI. Qu. 11866

1951-D-5047





Jewel wir von Gottes gna-  
den Johansfriderich / Der  
tzog zu Sachssen / Chur-  
fürst etc. vnd Burggrauē zu  
Magdeburg / Vnd Philips  
Landgrauē zu Hessen / Gra-  
ue zu CatzenElnbogen etc.

Die rechtmessigen vnd ge-  
gründeten vrsachen / vnser itzigen fürgenome-  
nen Defension / vñ wie wir zu derselben / durch  
widder rechtlichen gewalt / uerhaltung Got-  
tes ehre / auch der Libertet vnd freihait Dend-  
schē Nation / etzlicher massen / souiel wir in eil  
vnd bey diesen vnsern Kriegs geschefften / thun  
mögen / inn druck brengen / vnd es also / dieser  
zeit bey demselben / bis wir zu notdürfftiger aus-  
führung der vmbstende / vnd gelegenheit der sa-  
chen mehre müsse / vnd weile erlangten / hetten  
wenden lassen.

So hat vns doch eine aus-  
gegangene gedruckt / vnd vnrechtmessige vor-  
meinte / nichtige / vnd vmbstendige Nichts er-  
klärung / im namen Karln / des Fünfften / der  
sich / durch vnserē danon ausgegangen / vñ in die  
sem vnsern nachgehenden bericht / weiter an-  
gezeigten vrsachen / gehalten Kayserlichen  
dignitet / Hochheit vnd Ampts / selbst ent-  
setzt / zu ferner warhaffter vnd gegründeter ent-  
schuldigung bewegt vnd vorursacht.



Das er nun gleich im anfang / neben  
Churfürsten / Fürsten vnd Stenden des Rei-  
chs / auch inn sonderheit / an vnser Fürsten-  
thumb vnd Landstende vnterthanen zugehöri-  
gen vnd vorwandten schreibt / Darans hat ein  
jder vorstendiger / vnd dem sonderlich die ge-  
schwinde practick / vnd anschlege / welche er zu  
trennung vnd absonderung / vnter vnsern Mit-  
vorwandten vielmaln gesucht vnd angerich-  
tet / bewusst sein / leichtlich zuuermercken / was  
er damit meinet vnd suchet .

Nemlich / dieselben auch von vns vnd dem  
gehorsam / auch der pflicht vnd vorwantnis  
damit sie vns zugethan / abeziehen / do wir  
doch dieselben / vnser Fürstenthumb vnd Land-  
stende / vnterthanen zugehörigen / vnd vor-  
wanten also erkennen / das sie sich durch diese  
odder dergleichen geschwindigkeiten / von dem  
das inen jegen vns gebürt / nicht werden ab-  
wenden lassen .

Als er dann inn solchem druck gemeinig-  
lich durchaus / sonderlich aber im anfang /  
seine angeborne zunaigung / sinn vnd gedank-  
en / zu der Deudschen Nation / ehre / nutz /  
fromen / vnd wolffart / gericht / mit vielen  
scheinworten / rhümet / vnd sonderlich / wie  
er dieselbe / bey hergebrachter Libertet freihait /  
auch



auch allem friedlichem wesen / ruhe / recht / vnd  
einigkeit gerne erhalten wolte / Achten wir nie-  
mand eins solchen vorkerten vrteils sein / der  
aus den vorgehenden handlungen / geschich-  
ten vnd sachen / nicht klar vnd augenscheinlich  
vorstehen / vnd sonderlich / durch diesen sei-  
nen furgenommen Krieg / des er sich widder Got  
vnd Recht / alle fried vnd friedsstende / abschie-  
de vnd handelungen / vnd sonderlich widder  
seinen / vnd des heiligen Reichs auffgerichten /  
vnd fur sich selbst mit bewilligten / auch mit-  
vorsiegeltem vnd angenommen Landfrieden /  
vnserthalb vnerfordert / vnerhort / mit dem  
wenigsten / nicht vorursacht / auch one vorge-  
hende / rechtliche erkentnis seiner gethanen vnd  
mit leiblichem Nyde geschwornen Obligation /  
zuentgegen / vnd also mit eiteler that / eigens  
gewalts vnd furnemens vnterstanden / nicht  
vornemen möge / wie sich seine liebliche wort  
mit dem wercke vogleichen / Vñ das vielmehr  
sein zuneigung / sinn vñ gedancken / von anfang  
seiner Regierung bis doher / dohin gerichtet  
gewest vñ sein / die Dentsche Nation / sein Va-  
terland / inn vnfrieden / zerstörung / vnd vorters-  
ben zurichten / vnd dieselbe sampt iren Chur-  
fürstenthumen / Fürstenthumen vnd Herrsch-  
afftten / inn eine erbliche Monarchj / vnd ewig  
seruitut an sich zubringen / Zu dem ende hat er  
seine Erbliche Königreiche / vnd Lande / mit



höchster vngelegenheit vorlassen / vnd entlich  
wider seiner person noch vormögens hierinnen  
vorschonet.

Dann wiewol er gleich drauff einfüret /  
wie gnedig vnd Väterlich er sich bemüht / den  
vorterblichen zwispalt / der Religion zu Christ-  
licher vorgeleichung zubringen / vñ das eingeris-  
ssen mistrawen inn freundliche versünung vnd  
guttwilligkeit zurichten / So ist doch aus allen  
gepflogenen friedshandlungen vnd abschie-  
den / furnemlich aber aus dem Bündnis / so er  
mit dem Pabst auffgericht / vnd darvon her-  
nacher weitere meldung beschehen sol / klerlich  
zubefinden / welcher massen er vielmehr allwe-  
gen / auff die entliche vorfolgung vnd ausrot-  
tung / vnser waren Christlichen Religion / vnd  
auff die gelegenheit desselben / gesehen / auch  
die vorgemelte Abschiede / fried / vnd Friedens-  
stende dohin gerichtet / also das vns / vnd vn-  
sern Mitvorwandten / dieselben nicht lenger be-  
stendig blieben vnd gehalten worden sein / dan  
bis wir vnser gebüre der Reichshulffen ides-  
mal geleistet / Wenn das beschehen ist / so hat  
man als dann dieselben Fried vnd Friedensst-  
de / inn zweinel disputation / vnd andern vor-  
stand gezogen / So lang er mit Franckreich  
vortragen / mit dem Turcken einen anstand ge-  
macht / auch der Pabst vnd er / gelegenheit ge-  
habt /



habt / das vormeint partheßsch Tridentisch  
Concilium anzusetzen / zufürdern / vnd die vor-  
gemelte Bundtnis auffzurichten.

Wie wir dann des viel Exempel anzeigen  
köndten / vnd sonderlich aber dis hierinnen zu-  
erzelen nicht vnterlassen mögen / Als er  
vns / vnd vnsern Mitvorwandten vnter dem  
vorig gehaltenem Reichstage zu Regenspurg /  
Anno 41. ein Declaration vber den Regenspurg-  
gischen Reichs Abschied / vnter seinen hand-  
zeichen vnd Kayserlichen Insiegel gegeben /  
welche folgends durch König Ferdinandum /  
vnd domaln seine Mitvorwandten Kayserli-  
chen Commissarien prorogirt / Vnd darnach /  
vns vnd vnsern Mitvorwandten / von ime vnd  
seinen Commissarien vnd Rethen / diese vor-  
tröstung vnd zusage geschehen ist / das vns  
dieselbe Declaration vnd Prorogation / inn all-  
wege solte gehalten werden / hat er volgends  
auff dem Reichstage zu Speyr / Anno etc.  
44. Vns dem Landtgrauen / vber die vorge-  
melte genugsame erinnerung / selbst eigener  
person angezeigt / das er sich der bemelten De-  
claration nicht zuerinnern wüßte.

Zu dem hat sich der Bischoff zu Wildens-  
heim / vnter dem negßt vorgangenen Reichs-  
tage



tage zu Wormbs/inn der Fürsten Radt öffent-  
lich hören lassen / der Kayser hette dem jegen-  
teil vnd den Stenden / der andern Religion zu-  
gesagt / das der negst Speirisch Friedestand  
nicht lenger / dann nach der expedition wider  
Francreich domaln furgenomen / inn krefften  
bleiben solt.

Inn gleichnus / hat sich der von Gran-  
uel/ jegen vns dem Landgrauen/ negst zu Speir  
als domals der genante Kayser/ nach dem Rei-  
chstage zu Regenspurg / gezogen in beisein /  
des Pfaltzgrauen/ seiner Lieb/ vñ vnser Kethe/  
auch des Wirttenbergischen geschickten vor-  
nemen lassen / das der abschied zu Speir/ Anno  
44. nach gelegenheit der zeit vnd leuffte auffge-  
richt worden were / Aber nunmehr wu-  
ste sein herre der Kayser / denselben Abschiedt/  
bey den Catholicis nicht zuer halten.

Inmassen dann auch König Ferdinan-  
dus / auff dem Gesprechs tage zu Dagenaw /  
Anno 40. sampt seinen mitzugeordneten Kay-  
serlichen Commissarien / sich in irer jegen/ den  
genanten Pøbstischen gehorsamen Stenden/  
gethanen Proposition/ vnuorschemet hat dörr-  
ffen vornemen lassen / das man vns keine Rei-  
chshandlungen / noch abschiede zuhalten  
schuldig/ dann die weren von forcht wegen des  
Türcken



Türcken gewilligt / dieweil man vnser / dieses  
teils hülffe / widder denselben mit bedorfft  
hette / Ey welche eine ehrliche vnd redliche vr-  
sach / vns / vnd vnsern Mitvorwandten / guten  
glauben zubrechen / were das s̄ domit sie auch  
klar bekandt / das sie vns / vnd gedachte vnser  
Mitvorwandten / vmb vnser Türcckenhülffen  
vnd gelt / schentlich vnd gefehrlich betrogen.

Aus welchem auch klarlichen zuvorstehen /  
das er die entliche ausrottung vnd verfolgung  
der Religion / bey jme beschloffen / wie die vor-  
angeregt bündnis / das alles genugsam be-  
weist / anzeigt vnd zuerkennen gibt / vnd allein  
rechter gelegenheit / von einer zeit zur andern ge-  
wartet hat.

Vnd domit aber dasselbe sein vorhaben /  
einen schein haben möchte / als ob es ordentli-  
cher / gebürlicher vnd rechtmessiger weise besche-  
he / So hat er in allen handlungen dohin /  
gedrungen / das wir / vnd vnser Mitvorwand-  
ten / vns dem vormeinten Besftlichen / vnd  
sonderlich dem Orientischen parteilichen Con-  
cilio / vnd desselben erkentnis / solten vnterwer-  
ffen / **W**elchs wir aber / aus vnsern offte  
furgebrachten vrsachen / mit Gott vñ gutem ge-  
wissen / nicht thuen / noch sollich Concilium  
bewilligen / obder es fur das halten mögen /  
**B** Welches



welchs vormöge der Reichs Abschiede vorspro-  
chen / aus vrsachen / das der Babst part vn̄ Ri-  
chter / zu gleich sein wil / vnd darzu alle die / so  
inn dem Concilio Presidiren / vnd voces decisi-  
uas haben sollen / ime gelobt vnd geschworn  
sein / welche one zweuel widder inn nichts er-  
kennen werden / wie sich dann solchs gleich im  
anfange dieses vorgemelten partheilichen Tri-  
entischen Concilij befunden / do etzliche / seinen  
stand vnd wesen wollen angreifen / hat er dies-  
selben abgefordert / vnd andere an ire stadt vor-  
ordent / von welchem allen auff den Reichsteu-  
gen / vnd sonst / durch die vnsern gnugsame vr-  
sachen eingefurt / die wir hierzu abermaln repe-  
tirn vnd erholen.

Vnd ist also dis / sein / Karls / der sich etz-  
nen Kayser nennet / entlicher vorsatz vnd an-  
schlag gewest / den Schluss des vormeinten  
Concilij / jegen vns / vnd den vnsern zu exequi-  
ren / wie er dann bey etzlichen Potentaten vor  
guter zeit angesucht / dieselben zu sollicher Exe-  
quntion auch zubewegen / vnd dardurch vn-  
sere ware Christliche Religion / gantzlich aus-  
zutilgen / auch des Babsts Reich / vnd dessel-  
ben widder Christliche Lehr vnd wesen / Wel-  
chs er / seine ware Christliche Religion nennet /  
danor auch erkennet / ehret / vnd heldet / wid-  
derumb



dermab auffzurichten.

Dieweil er aber besorget hat / do er sich  
solcher öffentlicher Execution würde vnterfa-  
hen / das er damit / alle Religions Vorwand-  
ten Stende / widder jne bewegen würde / So  
hat er bey jme selbst / inn radt befunden / einen  
zeitlichen vngheorsam zuerdencken / auff das  
er vormittelt desselben / die vorbemelte Religi-  
ons Vorwandten Stende / trennen / vnd son-  
dern möchte / ane zweivel der hoffnung / wann  
er die Vornehmen derselben / gezwungen / vor-  
druckt / vnd vntersich bracht / das er hernacher  
sonnuel dester eher / mit den vberigen / seine  
gelegenheit schaffen / vnd ausrichten könd-  
te.

Vnd wiewol die genandte / Kayser vnd  
König / iren vleis furnemlich dahin gerichtet/  
diese geheimnis vnd böse practick / widder das  
Euangelium **JHESU CHRISTI** /  
vnd alle Bekenner desselben / zuuorbergen / zu-  
uordrucken vnd zuuordecken / Als ob / die sa-  
chen nicht den glauben / sondern etliche vn-  
gehorsamen allein betreffen solten / So hat  
doch **GDt** der Allmechtige / die dinge / so  
wunderbarlich geschickt / das jhe mehr sie bei-  
de dieselben anschlege haben wollen ferben vnd  
vorstreichen / damit sie nicht gesehen wurden /

**B ij** das



das sie ire gegebene fried vnd friedffende / bre-  
chen / vnd vnter solchem vntrewen schein / die  
guthertzigen auffhielten / Ihe mehr ire Rادت-  
schlege / schlus vnd voreinigungen heller an tag  
kommen / vnd meniglichen offenbar werden.

Dann was der Babst von diesem Kriege /  
an die dreizehen orter der gemeinen Nydgnos-  
schafft geschriben / das ist newlich im druck  
ausgangen / daraus auch vnwidersprechlich  
zubefinden / das der Babst / vnd vorgemelter  
Karl / der sich nennet / einen Kayser / sich wid-  
der Gott vnd sein Wort vorgliechen / das  
selbe gantzlich auszurotten / zu dempffen /  
vnd zuuordrucken / Und dann aber  
die ding noch mehr / weiter / auch stadtliz-  
cher vnd glaubwirdiger an den tag kommen /  
vnd meniglich daraus vornemen möchte / wes  
ir sinn gedanken vnd entlich gemüte sey / So  
hat Gott der allmechtige dem Babst den mund  
auffgethan / diese geheimnis vnd böse pra-  
ctiken selbst zuoffnen / dann welcher massen  
er durch seine Botschafft die Bündnis / zwi-  
schen ime / dem Babst / vñ genandtem Kayser /  
auffgericht / gemeiner Nydgnoschafft vorle-  
gen / vnd denselben danon Abschrift widder-  
faren lassen / worauff auch dieselbe Bündnis  
gericht / vnd gestelt sey / das wirdet der Ab-  
druck solcher nötel / ausdrucklich zuerkennen ge-  
ben /



ben/vñ meniglich daraus noch eigentlicher/ge  
wiffer vnd vngezweiffelter / abnemen / das der  
Babst / vnd er inn krafft dieser voreinigung be=  
schlossen / diesen Krieg / nicht alleine widder  
die Protestirenden / vnd die so wider das Con=  
cilium Protestirt haben / auch wider die / so mit  
vns inn Christlicher einigung stehen / sondern  
widder alle die / so (wie sie es nennen) inn die=  
sem misglauben vnd irthumb sein / furzune=  
men / vñ zumolenden / des entlichen fürsatzes den  
gehorsam / des Stuls zu Rome / vnd ire gew=  
lich Abgötterey (die sie iren alten warhafften/  
vnd vnzweiffelhaftigen glauben heissen) zu=  
wider bringen / inn welcher Bündnis / auch  
vorsehen / das der genant Kayser / keinen vor=  
trag mit vns / vnd vnsern Vorwandten / anne=  
men / odder auffrichten sol / das do diesem  
Kriege oder glauben / irer Vorwandten Chri=  
stlichen Kirchen / widderich / oder zu nachteil  
riren möchte / ane erleubnis vnd bewilli=  
gung des Babsts / odder desselben vnd des Röm=  
mischen Stuls / Legaten / Mit was ehren  
vnd gutem gewissen / nu gemelter Karl / genant  
Kayser / vnd sein Bruder der König / sich  
auff ergangenem Reichstage / itzt zu Regens=  
purg / vnterstanden / alle Stende des Reichs  
gemeiniglich / vnd dann etzliche in sunderheit /  
berriglich zupersuadiren / ja hoch zubetheuren /  
das er der Religion halben / keinen Krieg fur=  
B. iij. nemen //



nemen / sondern den zwispalt derselben / durch  
gütliche wege erörtern wolte / vnd wie er seine  
zusagen / vnd Reichs Abschied / auch die auff-  
gerichten friede / vnd Friedsstende / gehalten /  
das lassen wir meniglich vrteilen. Zu dem /  
das er auch vns / dem Landgrauen / negst zu  
Speyr selbst angezeigt / vnd der Grannehl vns  
geschrieben / das er mit dem Babst keine ei-  
ning vnd Bundtnis hette / Vnd hieraus  
sicht man die art vnd eigenschafft / seins Va-  
terlichen gemüts / auch die sinne vnd gedan-  
cken zu friede / ruhe / vnd einigkeit / der Deud-  
schen Nation geneigt.

*widail  
est*

Vnd / wer hat ihe mehr solliche vntrew er-  
faren / das ein Römischer Kayser / alle Chur-  
fürsten / Fürsten / vnd Stende des Reichs / mit  
vorkerten Worten / eins dinges zubereden vnter-  
stehen sol / do er doch das widderspiel bey ihe  
vorlangst beschlossen / vnd ein anders im her-  
tzen vnd gemüte tregt ? Vnd darff sich dane-  
ben / einen friedliebenden Kayser / beschu-  
tzer / vnd beschirmer des Vaterlands / nen-  
nen / wie aus vorberürter Bundtnis zusehen /  
das die vorlangen hat sollen auffgericht wer-  
den / vnd doch mit dem beschluss / bis auff des  
Bischoffs vnd Cardinals zu Trient ankunfft /  
vorzogen worden.

Wir



Wir wissen vns der angezogen Vorwant-  
nis / wie die Stende des Reichs / einem Röm-  
schen Kayser zugethan sein / wolzuerinnern /  
vnd gleichsals auch / was domaln / der Kayser  
inn der Franckfurdischen Obligation / auch ab-  
schieden des Reichs / vnd sonderlichen auffge-  
richten Contracten vnd Vortregen / sich hin-  
widder jegen Churfürsten / Fürsten / vnd Sten-  
den des Reichs / vnd Vns / verbunden vnd vor-  
schrieben / Auch wie er one das / gegen vns /  
als des heiligen Reichs belehenten Churfür-  
sten vnd Fürsten / mit gleichmessiger gegen Ob-  
ligation / aller der Artickel vnd Puncten halben /  
so inn seiner vormeinten Acht schrifft / aus vn-  
ser lebens pflicht / angezogē / besage der Recht /  
widderumb vorhafft gewest / Welchermassen  
er aber solche gegenpflicht / gegen vns gehalten  
vnd halten thut / das ist am tag / Vnd sonder-  
lich aus dem klar befundlich / das er vns vnser  
Fürstenthumb / Lande vnd Lebenschafften zu  
entsetzen vñ zu priuiren / vormeint / one bewei-  
sete schult vnd vrsachen / vnd Rechtliche erkent-  
nis / welchs doch inn seinen selbst Lehenrech-  
ten / ein treubruch des Lehenherrn / jegen dem  
Lehen Manne genent / vnd dafur geacht wir-  
det.

Es weis auch one zweiffel ein jeder Christ /  
das der gehorsam Gottes / allem zeitlichen ge-  
horsam vorzusetzen.

Darzu

*Der Gejste  
Leigeb*



Darzu ist es in der Welt also / wie man dis  
inn Biblischen vnd andern Historien findet /  
herkomen / wenn eine Oberkeit die Abgötterey  
beschirmen / vnd die vnterthanen darzu drin-  
gen / auch mit gewalt one recht / handeln wol-  
len / das die vnterthanen der Reiche / densel-  
ben widerstanden.

Vnd do er seine Obligation / darzu inen  
die Rechte verpflichten / auch Abschiede / vor-  
trege vnd vielfaltige zusagen / so er geschworn /  
vorschrieben vñ zugesagt / jegen vns so getrew  
lich / als wir vnser schuldige gehorsam / jegen  
jme gehalten / sich seins Kayserlichen Ampts  
nicht misbraucht / vnd nicht viel mehr lust ge-  
habt / Gottes Ehre / Wort / vnd Warheit /  
das er Lutherische vñ Ketzerische Lere nennet /  
auch die Freyheit der Deutschen Nation zumor-  
hindern / So were Fried / ruhe / vnd einigkeit /  
danon der bemelte sein druck mit worten sagt /  
im wercke wölerhalten / vnd dis itzig furneh-  
men abgestellt worden.

Dann hette er vns ihe vorgefordert / vnd  
vor allen Reichsstenden vnser antwort auff sei-  
ne vormeinte beschuldigung gehört / so were  
daraus klar befunden worden / das er keinen  
vngheorsam / jegen vns hette mögen mit grun-  
vorgeben / noch sonst keine andere vrsach wid-  
der



der vns haben mögen/darumb er mit vns nicht  
vortragen were.

Das wir aber ferner angezogen werden/  
das wir im seine gehabte mühe/ arbeit vnd vil-  
faktige vleissige handelungen vorhindert / vnd  
ime die schuldige gehorsam entzogen/vns wid-  
der ine auffgeleihnet zc. Solchs wirdet vns mit  
vngrunde / vnd keiner billigkeit zugemessen /  
dann wie vntertheniglich vnd vleissig / wir vnd  
vnserer Mitvorwandten / auff den gehaltenen  
Reichstegen/vnd sonst/vmb ware Christliche  
Reformation / auch vmb freundtliche vnd  
Christliche vogleichung / inn einem freiben  
Christlichen Concilio / inn Deudscher Nati-  
on zuhalten / Nacional vorsamlung oder Reis-  
chstag / angehalten / auch daneben gesucht/  
das bestendiger fried / vnd gleichmessig Recht/  
im Reich hette mögen erhalten werden / Wie  
wir vns auch zu allen schuldigen hülffen / da-  
rauff erboten / dieselben trewlich gelaistet / vnd  
welcher gestalt wir vns alles vnterthenigen ge-  
horsams befließen/das ist meniglichẽ bewußt/  
also das er auch vns / dem Landgrauen / zu Ke-  
genspurg / Anno 41. Folgends zu Speir / An-  
no 44. auch itzo / Anno 46. daselbst zu Speyr  
darumb gedanekt / das wir zu vogleichung der  
Religion/allen vleis gethan haben / Vnd wissen

E fur



fur gewis / das ime sein eigen gewissen anders  
sagt / Es sol aber hernach an seinem orte / wei-  
ter ausgefurt vnd dargethan werden / vnd do-  
mit auch / wie er vns mit gewalt vnd vnwarheit  
vorbotener Conspiration / beschuldigt.

Vnd nach dem er aber vns / den Landgra-  
nen / anzecht / das wir vns jegen etzlichen den  
furnembsten gliedern / vnter ertichtem schein /  
vnd gesuchter anforderung / inn Kriegshande-  
lung begeben / vnd dieselben mit abschätzung  
trefflicher Summen geldes / vorgewaltiget.

Darzu sagen wir / nicht an sein / das wir  
jegen etzlichen Bischoffen / vorgangener jar /  
durch glaubliche vrsachen / die vns darzu be-  
wegt / zuhandeln vorgehabt / Es ist aber  
doch meniglichen bewust / das wir durch die  
beide vorstorbene Churfürsten / Pfaltzgraff  
Ludwigen / bey Rhein / seliger gedechtnis / vnd  
Bischoff Reicharten zu Trier / solcher vnser  
handlung halben / mit denselben Bischoffen  
vortragen.

Zudem / das vns der Kayser solcher hand-  
lungen halben geschriben / ob er wol daruber  
ein vngnedigs gefallen getragen / So were er  
doch numehr mit vns wol zufrieden / dieweil  
wir domaln vnser Rüstung vnd furnemen ab-  
gestellt hetten.



13  
Als er vns auch auff dem Reichsta-  
ge zu Augspurg / dieser sachen halben angesp-  
rochen / haben wir ime / in beysein Königs Fer-  
dinandi / Pfaltzgraff Friderichs / vnd Hertzog  
Heinrichs von Braunschweig / vnd des Pro-  
bsts zu Wiltkirchen / vñ Bischoffs zu Nildens-  
heim / einen sollichen bericht gethan / das er  
desselben abermals zu friden gewest / vnd ge-  
sagt / do wir vns inn sachen / der Religion recht  
halten würden / wolt er vnser gnedigster Kay-  
ser sein.

Darumb so kan er dieselbe vnser han-  
delung zu keiner vrsachen / dieses seins Zu-  
gss / gegen Vns / mit einicher billigkeit fur-  
geben.

So seind wir auch des Wirttenbergischen  
handels halben / vñ das wir Hertzog Ulrichen  
zu der Recuperation des Landes / widder ge-  
holffen / mit dem Könige / zum Eaden in Behe-  
men / durch Hertzog Jorgen zu Sachsen / vnd  
den Bischoff zu Weintz / vortragen / welchen  
vortrag er Ratificirt.

Vnd daruber hat er mit vns zu Regenspurg /  
nicht allein dieser / sondern auch / der Wirtten-  
bergischen vñ anderer sachen halben / einen vor-  
trag gemacht vnd darinnen alle solche sachen /

C ij sie



sie seind heimlich odder öffentlich / gantzlich  
fallen lassen.

Darnach / so kompt er auff den Braun-  
schweigischen handel / wolt denselben auch  
gern zur vrsach seins fur habenden Kriegs ge-  
brauchen / vnd schlenst mit keinem grunde /  
wie das wir einen offenen Krieg furgenomen /  
vnd einen Fürsten mit heeres krafft vberzogen.

Darauff achten wir die vrsachen / vnser /  
vnd vnser Mitvorwandten / rechtmessigen De-  
fension jegen Hertzog Heinrichen von Braun-  
schweig / geübt vnd furgenomen / dieweil diesel-  
ben so offtmals dargethan / vnd im druck aus-  
gangen / in specie alhie zuerzelen / von vnnöthen  
sein.

Allein wollen wir dis / bey diesen puncten  
erregen / das wir dem genanten Kayser / Könige  
vnd auch allen Churfürsten / Fürsten vnd Sten-  
den des Reichs / auff dem negst gehaltenen Reich-  
stage zu Speir / Anno 44. einen klaren bestendi-  
gen / vñ gegründeten bericht / solcher vnser De-  
fension gegeben / auch mit warheit vnd grun-  
de ausgefürt / wie Hertzog Heinrich von  
Braunschweig / alle Iussion / Suspension /  
Mandaten / vnd gebot verachtet vnd nicht ge-  
halten / sondern darüber / die Stete Goslar vnd  
Braun-



Brannschweig also vorgewaltigt / vnd beschwert / das wir sie vor solchem seinem / zugefügtem gewalt erretten müssen / vnd mit solcher Defension / nicht lenger haben innehalten können / vnd sonderlich / dieweil er den Kayserlichen Commissarien / Eberten von Freyberg / vnd Doctor Knollern / welche domaln zu ime geschickt waren / offentlich gesagt / das er gedechte / sich bey dem vormeinten vnd partheischen Nichtvrtail / des vordechtigen Cammergerichts / wider Goslar ergangen / zuhandhaben / vnd darbey / sein leib vnd gut auffzusetzen / vnd darauff / auch solchs mit dem wercke beweist / vnd mit der that / fur vnd fur / fortgefaren.

richtel  
est

Wes Wir dann dieser dinge vnd anderer seiner vnfürselichen stücke / vnd thaten haben dargethan / auch Incontinenti / glaubwürdiglich bescheint / vnd vns zu weiter beweisung erboten / das ist ime / vnd dem Könige / auch andern Churfürsten / Fürsten vnd Stenden / noch wol bewußt.

Vnd wiewol Hertzog Heinrich einen vormeinten / nichtigen jegenbericht gethan / darauff wir vns alsbalde / mit vnser gegründten / vnd bestendigen notdurfft widderumb gefasset gemacht / vnd vmb weitere audientz bey genantem Kayser / angehalten / So hat er vns doch in  
C .iij. solcher



solcher vnser gefastten Antwort / weiter nicht  
wollen hören.

92  
39  
Gleichwol haben wir dieselbe / Churfür-  
sten / Fürsten / vnd Stenden des Reichs / in sch-  
riffen vbergeben / Aber worumb hat der ge-  
nante Kayser / die sachen nicht genugsam ge-  
hört / vnd mit sampt den Churfürsten / Für-  
sten vñ Stenden des Reichs / erkenntnis / darinn  
ergehen lassen? Es hat ihe an Vns vnd vnseren  
Mitvorwandten nichts gemangelt.

Er hat aber zu dem mal zu Speir / one zweif-  
fel der grossen hülffe halben / die er doselbst zu  
Speir wider Franckreich / vnd den Türcken be-  
gert / vnd auch erhalten / fursetziglich domit in-  
ne gehalten / vnd einen andern weg / nemlich /  
der Sequestration furgeschlagen.

Vnd wiewol solche handlung der Se-  
questration / durch vorhinderung des Kriegs /  
gegen Franckreich furgenomen / daselbst zu  
Speir anstehen blieben / so hat er doch auff den  
vorgangen Reichstag zu Wormbs / abermals  
hefftig angehalten / ime solche Sequestration  
zubewilligen / Welchs wir inn dann / vnange-  
sehen / das wir solchs von Rechts wegen / ni-  
cht schuldig gewest / damaln / zu ehren vnd ge-  
fallen gethan / vnd gewilliget / der gestalt / das  
das Land Braunschweig / in Pfaltzgraff Fri-  
derichs



derichs / vnd Hertzog Hansen von Baiern /  
zu Symern / hande gestalt / vnd jnen die ad-  
ministration / bis zu gütlicher odder rechtlicher  
erörterung / befohlen werden sollte.

Darauff er vns alsbalde vortröstet / dessen  
auch glaublichen schein gegeben / den wir noch  
beihanden haben / das Hertzog Heinrich die  
Sequestration / auch solt bewilligen / vnd da-  
wider nichts thedlichs furnemen.

Nat auch darauff ernstliche special Man-  
data / an jnen / das er solcher Sequestration  
geleben / auch mit der that jegen vns / oder dem  
eroberten Lande / bey peen des Landfrieden /  
nichts furnemen sollte. Vnd darnach ein Gene-  
ral Mandat / das jme niemand zu seinem furne-  
men wider die Sequestration hülffe / oder fur-  
derung thuen solt / Publiciren vnd ausgehen  
lassen.

Aber er / der von Braunschweig / hat vns  
angesehen / solcher Sequestration vnd Man-  
daten / ob jme die wol vorkündet / auch vber vñ  
wider / die auffgerichte Friedstende vñ Abschie-  
de / vns / vnserer Mitvorwanten / vnd das Land  
angegrieffen / beschedigt. Vnd hat vns Gott  
der almechtige / das glück vnd Sieg gegeben /  
das Er vnd sein Son / sich ergeben / wie das in  
Hertzog Moritzen zu Sachssen / vnd vnsern /  
des Landgrauen / ausschreiben genugsamlich  
dargethan. Vnd



Vnd das wir den Kayser / inn solchem  
auffschreiben gerhümet / ist aus dem beschehen /  
das wir vns der nachfolgenden practiken / ni-  
cht vorsehen / Sondern als ein einfelti-  
ger / guthertziger Dendsher / der sich dieser ge-  
schwindigkeiten nicht vormutet / die sachen /  
wie sie allenthalben ergangen / erzelet.

Vnd haben beschlieslich in diesem Braun-  
schweigischen handel / anders nichts furgeno-  
men noch geübt / dann das vns gebüret / vnd  
wir vormöge aller recht / befüget sein / also das  
wir auch / dieser sachen halben vor allen vnpar-  
theischen / Potentaten / auch vor dem gantzen  
Reiche / vnd vnparteischen Stenden / keine  
scherwe haben / sondern vor jnen recht leiden  
mögen.

Aber bey diesem punct / ist abermaln des  
genanten Kayfers gemüte / jegen dieser Religi-  
on klerlich zuormercken / Dann / wiewol  
Hertzog Heinrich ime / inn dem / was Goslar  
vnd Braunschweig betrifft / nie keinen gehor-  
sam gelastet / sein gebot furnemlich voracht /  
jnen auff die furgeschlagene sequestration / an  
seinen ehren vnd wurden schwerlich angegrif-  
fen / vnd so hoch angezogen / Als ob er jegen  
ime / seins Nyds / brieffe / Siegel / trawens vnd  
glaubens vorgessen / vnd vber die Sequestra-  
tion



tion vnd ausgegangen Mandata / Vns vnd  
vnserer Mitvorwandten / wie gehört / vberzo-  
gen / So hat man doch augenscheinlich vor-  
merckt / das Hertzog Heinrich / als nicht der  
geringste von den Papisten / dadurch bey ge-  
dachtem Karl / genant Kayser / nichts hat vor-  
wircken können / Sondern alle sein handlung  
vnd furnemen / hat recht vnd vnstrefflich sein  
müssen.

Vnd kan also ein jeder vorstendiger / hie-  
raus leichtlich ermessen / das er diese handlung  
zur vrsachen seins Kriegs / mit vnbilligkeit je-  
gen Vns / furgibt / vnd vnter dem schein / dieser  
vnd der hernachgehenden / vnwarhafften be-  
schuldigungen / ein anders sucht / Dann / was  
solten wir doch inn Hertzog Heinrichs sachen  
mehr gethan haben? Wir haben vns zu  
Speyr / wie oben gehört / vnserer furgenome-  
nen Defension halben / genugsam vorantwort /  
darauff auch als balde der Churfürsten / Für-  
sten vnd Stende des Reichs / sämtlichen be-  
schied leiden mögen.

Darzu haben wir die Sequestration / die  
der Kayser begert / gewilligt / vnd also vormöge  
derselben / gütlichen oder rechtlichen austrag /  
leiden mögen / Vnd wiewol er ime gebo-  
ten / dieselben auch zubewilligen vnd zuhalten /  
D So ha



got. hat  
vns vgr

So hat er vns doch nichts dester weniger vber-  
zogen / also / das wir vns / genotdrangte / gegen  
wehre haben müssen gebrauchen / darunter  
vns Gott der allmechtige abermals den Sieg  
gegeben / wie obgemeldet.

Dem Braun  
schweyger  
begüt

Aus diesem allem / erkenne nu ein jeder /  
Christlichs vnd erbars gemüts / was wir doch  
gemelter Braunschweigischen sachen halben /  
mehr solten gethan haben / dann wie gehört /  
vnd sunderlich dieweil wir gütliche oder recht-  
liche handlung vnd erörterung / haben leiden  
mögen / vnd also alles gethan / das damaln der  
Kaysler / begert hat.

Das wir etzliche Gefürste / Bischoffli-  
che / vnd andere geistliche Stifte vnd Prelatu-  
ten / Graffschafften vnd Herrschafften / dem  
Reich gewaltiglich / vñ mit der that entwendet  
etc. Solchs wirdet vns gleichs vngrundes /  
mit vnwarheit zugelegt.

Wette er auch solche Stifte / Graffsch-  
afften / vnd Herrschafften / so wir dem Reich  
gewaltiglich entzogen solten haben / namhaff-  
tig gemacht / So wolten Wir / vnd vnser iher /  
nicht vnterlassen haben / augenscheinlichen /  
waren gegenbericht / hiermit / dawider zuthu-  
en / Dieweil es aber an allen bestand / so hat er  
der benennung vñ Specification / geschwigen.

Dann



Dann Wir / der Churfürst / wissen mit vnser / vnd vnser Vetter Dertzog Moritzen zu Sachsen etc. grosveterlichen ertheilungen / so vor etzlichen vnd sechtzig Jaren / vor vnser geburt gemacht worden / darzuthun / wie die drey Bischoffe / vñ Bischoffthumb / Meissen / Mersburg / vnd Naumburg / mit des Hauses zu Sachsen / daran vor alters hergebracht / Herrlichkeiten / Gerechtigkeiten / auch alle vnserre Prelatur / Stifft / Grauen / vñ Herrn / zwischen / vnser beider Anherrn vnd Grosvatern / seligen / geteilt sein worden / Dieweil wir aber deren / auff den heutigen tag / keine mehr vnter dem Reich haben / dann wie die in vorberürter ertheilung / vor sechtzig Jaren benant / vnd zum Hause zu Sachsen zuvor gehört / So ist jhe daraus klar / vnd genugsam zuvorstehen / das wir keine Stifft / Prelatur / Graffschafft / oder Herrschafft dem Reiche mit gewalt entzogen mögen haben.

Wissen vns auch dieser dinge / das die der massen solten von vns surgenomen sein / nicht zuerinnern / vielweniger / das wir vns / die gefreieten vom Adel vnd Ritterschafft / vnter vns zuziehen vnd zu dringen / vnterfangen.

Dieweil vns aber dergleichen vnware zuzlagen / durch den von Braunschweig vnd andre / vormals auch zugemessen / darauff wir als bald / vnser vnschuld surgebracht / vnd fol-

D ij gends



gends in druck gegeben/ So lassen wir es bey  
derselben/vnser vorantwortung/ disfals auch  
beruben/ vnd wollen vns darauff hiemit gezo-  
gen haben.

Wolte auch der Kayser/ durch diesen sei-  
nen anzug/ den vormeinten Bischoff zu Neum-  
burg/ Julium Pflug/ meinen / So haben  
Wir / der Churfurst zu Sachssen / inn vnserm  
negsten gemeinen schreiben/ dis puncts halben  
genugsam antwort gegeben.

Darzu haben wir auch hieueorn/ wider  
genanten Pflug/ durch etzliche Abdrucke / ge-  
nugsame vnd warhafftige ausführung gethan /  
das wir Vns/ gemelts Stiffts Naumburg/ gü-  
ter/ Kenthe/ Gülden/ Oberkeiten/ oder Gericht-  
barkeiten/ nie angemasset/ noch auch deren ge-  
rechtigkeiten/ so dem heiligen Reiche daran zu-  
stendig/ Sondern der mishorstand vnd zant/  
hat sich Pflugen person / vnd nicht des Sti-  
ffts halben / mit vns / vnd darumb erhalten /  
das er sich vnterstanden / vor einen Bischoff  
des orts einzudringē/ mit tedlicher entziehung/  
entwerung/ vorunrnigung vñ entsetzung/ auch  
vorbrechung/ vnser vnd des Hauses zu Sach-  
ssen/ hergebrachtē / zustendigen herrlichkeiten  
vnd gerechtigkeiten.

Zu dem / das er vnser warhafftigen /  
Angspur



Augsburgischen Confession / vnd Christlicher  
Religion / furnemer vorfolger / vnd widder=  
wertiger einer / auch durchrechtiger des Vater=  
lands / vnd anhenger vnser widderwertigen /  
alweg gewest / vnd ist / derhalben er vns / inn  
vnserm Fürstenthumb vnd Erbschutze / so vns  
an mehr gemeltem Stiffte gebürt / vor einen  
Bischoff nicht zu wissen / noch zu gedulden /  
Daben vns auch hierumb alwege / zu gebürli=  
chem erkentnis jegen jme erboten.

Vns aber / dem Landgrauen / würdet der / so  
sich einen Kayser nennet / auch nichts anzeigen  
können / das wir etwas vngbürlichs / hierin=  
nen gethan hetten / do wir entzweyer / mit dem=  
selben / darinnen wir in jrrung gestanden / nicht  
vortragen / odder der Kayser vns selbst / mit jme  
vortragen hette.

Wie eigennützlich aber er mit einziehung /  
trefflicher des Heiligen Reichs / Bischoffli=  
chen vnd Fürstlichen / auch anderer Stiffte vñ  
güter / widder Gott vnd gewissen / vnd seine ge=  
schwornē Franckfurdische Obligation / gehan=  
delt / das ist inn vnserm nebern drucke aus=  
gefürt / vnd möchte der genante Kayser /  
wol seinen balcken vor / aus dem ange gezogen  
haben / vnd vns darnach sagen / das wir den  
spreissen aus vnsern augen thuen solten.

D iij Vnd  
Der Keyser hat byl zu gesaget  
vnd gelt wenig



Vnd sagen darzu weiter / was wir mit Für-  
sten / Grauen vnd Herren zuschaffen haben /  
das wir vmb alle ansprach / nicht allein das or-  
dentlich / sondern auch vordinglich Recht / lei-  
den mögen / wie wir vns dann zu demselben hie-  
mit nochmals thuen erbieten.

Es ist aber aus diesem seinem furgeben /  
vnd auch der handlung / welche er vor der zeit /  
mit denen vom Adel / vnd der Ritterschafft fürs-  
nehmen lassen / wol zuuorstehen / was er damit  
süchet / Nemlich / dieselben an sich zuhengen /  
vnd sie wider vns / zu steure / seins furnemens zu  
bewegen / damit er souiel dester mehr / krafft /  
vorgemelter Bundtnis / daran vnnorhindert  
werden möchte.

Gleicher vnbilligkeit / werden wir auch in  
dem beschuldigt / als solten wir etzliche inn vn-  
sern schutz vnd schirm practicirt haben / in mei-  
nung / dieselben vom Reich zuziehen / vnd vns  
selbst zu zu eigenen.

Wir seind aber des nicht inn abreden / die  
weil es von alters im Reiche herkomen / auch  
vblich vnd brenchlich gewest / das sich etzliche  
Stende vnd Stedt / inn anderer schutz vnd  
schirm haben mögen begebē / das wir in gleich-  
nis / solche Stende vnd Stedte / auff jr besche-  
hen



ansuchen / in vnserē Christliche einigung / vnd  
in schutz vnd schirm / vnser waren Christlichen  
Religion halben / genomen haben / allein / das  
sie derselben Religion / vnd daraus fließenden  
sachen halben / vor vnbilllichem gewalt bleiben  
möchten.

Welchs wir vns in dem falle / sonderlich vor  
Gott schuldig erkand / vñ erkennen / nach seinem  
Göttlichen befehl / nemlich / Errettet den armē /  
vnd erlöset ihe / aus der Gottlosen gewalt / Vnd  
an einem andern orte / Errette die / so man töd-  
ten wil / vnd entzeuch dich nicht / von denen /  
die man würgen wil / Wem ist aber nun bey  
vielen jaren her / schutzens vnd rettens / wider  
vnrechten / Tyrannischen gewalt / mehr von  
nöten gewest / vnd heutigs tages / dan denen /  
so man für Lutherisch achtet vnd heldet ?

Was aber aufferhalb der Religion / iren  
schuldigen gehorsam / gegen iren / odder an-  
dern Herrschafften anlanget / darmit haben  
wir sie inn solchen schutz nicht gezogen / son-  
dern vleissig ermanet / auch angehalten / sich  
domit / als Christen gehorsamlich vnd pflicht-  
bar zuhalten / wie auch / als wir furwar wis-  
sen / geschehen / vnd genugsam dargethan könd  
werden.

Wir / der Landgraff / wissen vns dan-  
noch / noch zuerinnern / das wir vns vnter dem  
Reichs



Reichstage zu Regensburg / mit dem Grauen  
zu Nassaw / zu Weilberg / eins Tausches odder  
Wechsels vorgliechen / vnd wir die Stad Metz  
lar / inn vnsern schutz namen / vnd sonderlich  
Nürnberg / das er / der genante Kayser / sich  
vornemen lassen / er sehe solchs nicht vngerne /  
Sondern es geschehe ime selbst mit zum besten.

Vnd vorwundert vns solchs anzeigens /  
das er vns zulegen darff / als ob wir mit etzli-  
chen Stenden practicirt / vnd sie dohin zu wei-  
sen vnterstanden / den ergangen Regenspurgi-  
schen Reichstag / nicht zubesuchen / So  
wir doch mit grunde vnd warheit / auch mit de-  
nen Stenden / so auff dem tage zu Wormbs ge-  
west / das widderspiel / darthuen vnd beweisen  
mögen / Dann wir köndten bey vnsern Fürstli-  
chen ehren vñ wurden / beteuren / als auff negst  
vorgangen j. Aprilis / ein vorsamlung tag / vn-  
ser vnd vnser Mitvorwandten Stende / jegen  
Wormbs angeschrieben / vnd Wir / der Land  
graff / damaln zu Speyr geweest / vnd ime dem  
genandten Kayser angezeigt / Wir wolten mit  
denselben / vnsern Mitvorwandten Stenden  
handeln / sich furderlich nach Regenspurg zu-  
begeben / das wir gleich drauff / alsbalde aller  
Stende Kethen / vnd botschafften jegen Wor-  
mbs geschrieben / das sie sich furderlich da-  
hin / nach Regenspurg / wolten begeben / damit  
er /



er / zu besteweniger vngnaden bewegt / vnd vns  
vnd vnsern Mitvorwandten / keinen vorweis /  
zulegen möchte / als ob wir die handlung / dar  
vmb der Reichstag ausgeschriben / auffhiel  
ten vnd vorhinderten / wie sie sich dann auch /  
alsbalde nach Regenspurg erhebt / doselbst er  
schienen / vnd die ausbleibenden von vnsern Zi  
nungsvorwandten / Stenden / doselbst hinzu  
kommen / eilends erfordert vnd beschriben /  
Desgleichen wir / der Churfürst / vnsern Ke  
then gegen Wormbs geschriben vñ befohlen /  
das sie solten anhalten bey den andern Sten  
den / das sie nach Regenspurg furderlich vor  
rückten.

So weis auch meniglich / wie gehorsam  
lich / wir vielmaln eigener person / mit grosser  
vngelegenheit / vnd vorseumnis / vnser Lande  
vnd Leute / vnd dann auch / durch vnser stad  
liche Kethe / die ausgeschriebene Reichstage /  
vnd Gesprächstage / besucht / vnd keinen nie vn  
beschickt gelassen / alles zu dem ende / Friede /  
ruhe / vnd einigkeit / im Reiche / helffen zu pflan  
tzen vnd auffzurichten.

So beschicht vns auch inn dem vngüt  
lich / das er vns zumisset / das wir weder gericht  
vnd Oberkeit hetten erkennen wollen / vnd die  
Administration der Justicien turbirt / vnd vor  
hindert



hindert solten haben/ das wir auch wolgespro-  
chene vrteil/zunolziehen/gesperret/vnd letztlich  
das höchstie gericht / im Reiche gar auffgehob-  
ben.

Dann wie partheilich / gefehrlich / vnd  
geschwinde / die vorgewesene Cammerrichter /  
vnd Beisitzer / in Religion vnd prophan sachē /  
gegen Vns vñ vnsern Mitvorwanten / aus hasß  
der Religion / gehandelt / aus was rechtmessi-  
gen vrsachen / wir auch dieselben Recusirt / vnd  
für Richter nicht mehr halten / erkennen / noch  
ihrer erkenntnis / vns vnterwerffen können / das  
ist offft vnd vielmaln dargethan / auch solche  
vrsachen / der partheiligkeit vnd Recusation ins  
druckausgangen.

Also das Vns / vnd vnsern Mitvorwand-  
ten / keins wegs zuthuen / oder zuraten / gewest /  
solcher partheilichen / vordechtigen / vnd vmb-  
beschehener Recusation willen / vorbitterten /  
Leute erkenntnis / vber vnser leib vnd gut / zuge-  
warten / vnd haben derhalben / nicht an dem  
Kaysertlichen vnd des Reichs gerichte / sondern  
an den Personen mangel gehabt.

Dann sie haben vnter andern vielfeltigen /  
beschwerungen vnd vrsachen / die wir ihrent-  
halben / rechtmessiglich / furgebracht / keinen  
Assessorn / an dis gerichte / zulassen wollen / er  
habe



Habe dann den Augspurgischen / vor die Beba-  
fliche / Religion gemachten Abschied / gesch-  
worn / vnd sey auch irer Religion vñ glaubens /  
vnd nicht vnfers gewesen.

Diweill dan (Gott lob) so ein grosser teil/  
vieler Churfürsten / Fürsten / vñ Stend des Rei-  
chs / der Augspurgischen Religion / zugethan  
vnd vorwant / Warumb solte dann der groste  
vnd vormögliche teil / die personen seiner Reli-  
gion / nicht am Cammergerichte haben? als  
wol als der geringste teil.

Vnd nach dem wir alle vmbstende vnd ge-  
legenheit / der sachen zu Speir / Anno 44. dar-  
gethan / ist letztlich auff vnser vielfeltig Klagen vñ  
anhalten erfolgt / das die vorigen vordechtigen  
Cammergerichts personen / abgeschaffet / vnd  
daneben vorordnet / das in einer benanten zeit /  
andere / newe / tügliche / geschickte / gelerte / per-  
sonen / vnangesehen / was Religion die seind /  
an das Cammergerichte aus den kreissen ge-  
setzt / vnd des Rechts / auch der Administra-  
tion der Justicien halben / diese weitere voror-  
denung beschehen solte / das der Augspurgi-  
sche Abschied / vnd Wormbser Edict / derglei-  
chen die gemeine beschriebene Recht / gegen  
den Stendē / der Augspurgischen Confession /  
soniel die Religion belangt / nicht statt haben  
soltten.

R ij Alles



Alles inhalts vnd vormöge des vor ange-  
zogenen Speirischen Abschieds / Welcher  
Abschied auch / von ime dem Kayser / vnd allen  
Churfürsten / Fürsten / vñ Stenden des Reichs  
bewilligt / angenommen / besiegelt / zuhalten / zu-  
gedulden / vnd niemands dawidder zubeschwe-  
ren / zugesagt.

Wir haben aber auff vnser vnd vnser Mits-  
vorwandten / offft beschehen anhalten / bitten  
vnd ersuchen / auch vber geleistete hülffen / we-  
der solche besetzung / noch die vorordnung des  
Rechtens / erlangen mögen / sondern / es hat  
folgende zu Wormbs / dem gemelten Speiri-  
schen Abschiede / ein anderer gantz vngleicher /  
vnd gefeßlicher vorstandt / gegeben wollen wer-  
den.

Welchs wir vns ihe nicht vnbilllich be-  
schwert haben / vnd daraus / den obgemelten  
des Bischoffs / von Wildensheim anzeigun-  
gen / desto mehr glauben geben müssen / Nem-  
lich / das dieser Speirischer Friedestand / vnd  
Abschied / alleine zu einem schein / die hülffe je-  
gen Franckreich / dadurch von vns zubringen /  
vnd nicht darnumb denselben wirglichen zuhalten  
auffgerichtet / were worden.

Nach dem wir nun hierinnen / ihe nichts  
anders



anders gesucht / odder begert / dan was der klare  
re buchstabe vnd vorstand / des ein mal / vnd  
einhelliglich zu Speir gewilligten Abschieds /  
zuerkennen gibt / So hat vorgemelter Kayser /  
jhe keine billigkeit vor eine ursache / dieses kriegs  
vorbemelten punct jegen vns / furzunwen  
den.

Als er dann vnter andern / den gehorsam /  
der Weidnischen Kayser / Könige vnd Oberig-  
keiten einfüret / vnd daraus schliessen wil / das  
wir vmb soniel desteweniger / fug vñ macht ha-  
ben / vns jegen ime als vnser ordentlichen Obe-  
rigkiet / auffzubewmen.

Darzu sagen wir / das wir ime nicht al-  
leine vnsern schuldigen gehorsam / sondern auch  
darüber weiter / dann wir ime vorpflicht / Auch  
mehr / dann vnser Vorfaren / Römischen Kay-  
sern / vnd Königen jhe gethan / erzeigt vnd ge-  
leistet / vns selbst / auch vnser arme vntertha-  
nen / zum höchsten angegriffen vnd beschwert.  
Vnd inn Summa / so köndten wir nicht befin-  
den / was wir einem Kayser / nach hergebracht-  
ter gewonheit vnd Libertet des Reichs / weiter  
betten thuen / odder leisten sollen.

Vnd das wir / wie auch andere Stende  
mehr / vns nur zu viel wilferig / auff guten vor-  
strawen



Der Key.  
Her Wil.  
rich  
Eylers

trawen vnd glauben / das es von jme in gnaden  
vormarckt vnd erkand solt werden / gegen jme  
gehalten / vnd erzeigt / das befindet sich aus sei-  
nen selbst reden / So er vnlängst jegen einem ge-  
sandten / des Königs von Franckreich / so inn  
botschafft zu jme geschickt gewest / gethan /  
dann wie derselbe / jegen jme dieses seins furge-  
nomen Kriegs gedacht / vnd vnter andern der  
gestalt / das er sich eins grossen wercks vnter  
stund / solt gleichwol bedencken / was die De-  
utsche Nation / vor eine treffliche / grosse /  
Nation were / darumb jme nicht ein geringes  
darauff stehen wolte / Vnd so einer odder mehr  
Stende etwas / widder jne gethan / so köndte  
zwischen jme vnd den selben / wol handlung  
forgenomen / vñ die sachen außserhalb Kriegs /  
vorrichttet werden / Darauff sol jme der genan-  
te Kayser / geantwort haben / Es bedürffte kei-  
ner handlung / er gedechte die Deudschen zu  
zwingen / vnd wolt ebenicht Kayser sein / Aber  
der Deudschen macht / köndte dieser zeit so  
gros nicht sein / dann er were nun ein zwentzig  
Jar her / mit dem wercke vmbgangen / wie viel  
nun / jme die Deudschen hierinnen / vor hülff-  
fe gewilligt / vnd geleistet / vnd darzu / widder  
seinen Derrn (den König von Franckreich mei-  
nend) selbst geholffen / Desgleichen was  
sie vor zerung / mit besuchung so viel Reichs-  
tege gethan / auch wie viel der Deudschen /  
inn



inn solchen zwentzig Jaren / erschlagen vnd  
vmbkommen / das were wesentlich / Welchs  
er alles darumb gethan / damit die Deudschen  
an irer macht vnd vormögen geschwecht / vnd  
gemettet würden / Vnd wuste ferner / das  
die Deudschen kein gelt hetten / sondern des  
aus berürten vrsachen / fast erschepfft / vnd als  
so nicht bey voriger macht weren / Darumb  
were zu seinem furnemen / itzt gleich die rech-  
te zeit etc. Vnd dieses hat ein ehrlicher /  
glaubwürdiger berichtet / dem es obgedachter  
geschickter / des Königs von Franckreich / selbst  
also angezeigt.

Wo seind aber seine Lyde vnd pflichte /  
die er dem Reiche / auch sunderlich auff die  
Franckfurdische Obligation / vnd pacta ge-  
schworen / in solchem seinen vor langst vnd hies-  
der dem ein vnd zwentzigsten jare her / jme vor-  
gesetzt / furhaben / von jme betrachtet. Mit  
was grund vnd warheit / mag er auch / wid-  
der vns solche vrsachen / zu diesem seinem Krie-  
ge / inn seiner nichtigen / achtserklerung / er-  
tichten / Dieweil er damit bereit vmbgan-  
gen / ehe Wir / der Churfürst zu Sachsen  
etc. ein regirender Churfürst worden / vnd  
Wir / der Landgraff zu Hessen / noch inn dem  
vordamlichen Babstthumb gehafftet / vnd ge-  
steckt /



steckt / auch der dinge noch keins vorhanden /  
gewest / darumb er vns jtz vngehört vnd vner-  
kandt / vormeint / zu dem / das es doch alles  
aus / vnd von wegen der Religion / herfleust /  
schuld zu finden.

Vnd das er allein vnser waren Christli-  
chen Religion halben / ime vor souiel jaren / fur-  
gesetzt inn Dentschen Landen Krieg zuerwe-  
cken / vnd vordruckung / derselben Nation /  
vnd des heiligen Reichs Freyheiten / Stands /  
vnd Stads / dauon vrsachen zuschepffen /  
Solchs ist / neben obberürter seiner reden /  
aus seinem Wurmbschen Edict / genug-  
sam zuuorstehen / domit er ime widder Gott /  
vnd sein Kayserlich Ampt / welchs er zu schutz  
vnd schirm Rechtes / warhafftiges / Gottes  
diensts / vnd nicht zu handhabung / vnchrist-  
licher Lere / vnd offentlicher Abgöttery / zuge-  
brauchen schuldig / auff dem Reichstage zu  
Wormbs / vnd eben im Jar / der weniger zal 21.  
eine furberettung gemacht / durch welchs er  
auch / zu allen bisher / im Reiche ervolgter /  
vnd entstandener vnruhe / vnfrieden / mistra-  
wen / betrübung / vnd anderer vnrichtigkeit  
selbst / vnd niemands anders vrsach gegeben /  
dauon aber hernach / ferner ausführung / mit  
der kurtze beschehen sol.



So er vns auch die Pacta / Obligation /  
Friedstende / Declaration / vnd Abschiede /  
vnd was er Vns / vnd vnsern Mitvorwandten /  
in gemein / vnd durch sonderliche Pacten / vnd  
Obligation vorschrieben / gehalten / So het  
ten wir vns / hinwider auch / wie sich gebürt /  
gegen jme erzeigt / Die weil er aber seiner  
Pacten / Obligation / gemeinen vnd sonderli-  
chen zusagen / vorgeffen / vnd dieselben zurü-  
ck gestellt / vnd dann der Göttlich gehorsam / wie  
vor gehört / allem andern gehorsam / vorge-  
het / auch bey den Weiden / vnd andern Nati-  
on / so eine Oberkeit jr Ampt misbraucht / sich  
vielmal erfunden / das sie sich derselben wid-  
dersetzt / auch einem Tyrannen widderstan-  
den / vnd er durch Gott darüber gestürtzt wor-  
den / So entsetzt er sich selbst / seins Ampts /  
Standts / vnd Wesens / Vnd sol billich nie-  
mand / dann jme selbst / die schuld zumessen.

Dann er gibt in zweierley wege vrsachen /  
das man seiner Tyranny / vnd furgenommenen  
Mörderey / mit Gott vnd gutem gewissen / wid-  
derstehen mag / Als nemlich / das er sich da-  
mit vnterstehet / Gottes beuehl vnd ordenung /  
vnd den Stand / vnsern waren Christlichen /  
glaubens / Vnd dann / zum andern / den  
Stand des Weiligen Reichs / Deudscher Na-  
tion / widder desselben hergebrachte Freihei-  
ten /



ten / vnd Rechte / die er zuerhalten pflichtig /  
vnd leiblich geschworen / zu zerrütten / vnd vmb  
zustossen / Inn welchen fellen sonderlich / ni-  
cht alleine Heidnischen / sondern auch Christ-  
lichen / Historien / vnd Göttlicher Heiliger  
Schrift nach / solchen Tyrannen gesteuert /  
vnd widerstanden mag werden.

Nach dem der Oberigkeit Tyranny / vnd  
vnrechter gewalt / nicht Gottes Ordnung ist /  
welcher die Schrift gebent / zugehorsamen /  
Sondern des Teuffels vñ bösen Geists getrieb  
vnd werck / ist auch inn der Oberigkeit Juris-  
diction / nicht gehödig / Gottes Wort / vnd die  
ware Religion zuorbieten / Vnd der Kayser  
vbet solche Tyranny / alhie vor sich selbst /  
vnd Privatlicher weise / do auch die Recht / eis-  
nem jden wenigens / dann Fürstenstandes / zu  
lassen / sich mit der faust zuwehren / vnd zu de-  
fendiren / Darzu sein Wir / vnd andere  
Churfürsten / Fürsten / vñ Stende des Reichs /  
des genannten Kayfers vnterthanen / nicht an-  
ders gewest / dann auff seine vorbrieffte vnd ge-  
schworne Condition / Vnd so ferne er Uns /  
vnd dem Heiligen Reiche / dieselben gehalten /  
Welchs er nicht gethan / Darumb wir ine  
auch billich vor vnsern Kayser vnd Oberigkeit /  
numehr nicht erkennen / noch halten / Son-  
dern / als vor einen / so ein Tyrann worden / vnd  
sich seins Ampts selbst entsetzt hat / Welchs zu  
einer ander gelegenen zeit / weiter erklet sol wer-  
den. Wir



Wir haben auch gern vernommen / das  
er der sonderlichen Vortrege / so er mit vnser je-  
dem innerhalb kurtzen jaren / vffgericht / gesten-  
dig / vnd sich mit gnaden / wie er es nennet / ge-  
gen Vns erzeigt vnd bewiesen wil haben / Aber  
billich het er solche vortrege gegen vns halten /  
vñ diese treffliche Krigs beschwerden / vmb  
einmal gentslich vorloschene vñ vffgehobene sa-  
chen / nicht furnemen sollen / Zu dem das ihm  
auch vnmüglich gewesen / darzuthun / das wir  
vor / oder auch nach solchen vortregen / einiche  
Rebellion geübt / wo auch die Richter seiner ni-  
chtigen Achtserklärung / vorstanden / was das  
wort / Rebellion oder Rebellis / vff im hat / vnd  
vor handelungen erfordert / So wurden sie  
sich selbst haben schemen müssen / vns damit /  
solcher gestalt zubeschweren.

Aber wer sein Wurmbser vnchristlich E-  
dict lieset / der befindet daraus wol vñ klar / das  
eben dis sein furnemen / vff nichts anders ge-  
richt ist / noch gehet / dan der Religion halben /  
zu einer Execution desselben / vnd des darauff  
abgerichteten Tridentischen Concilij / auch zu  
volnstreckung der peenen / welche er / Anno xxi.  
der wenigern zal / wider die jenigen / darin voror-  
dent so solchem Edict nicht gelebten / Sondern  
D. Luthers seligen / warhafftige / Christlichen  
vnd Euangelischen Lere / vnd der daraus ge-  
wolgten Augspurgischen Confession / anhen-  
gig sein würden.



Ferner ist auch Vnser odder vnserer Mit-  
vorwandten gemüte nie gewest / noch vnsern ge-  
dancken furkommen / nach der Kayserlichen ho-  
cheit / Authoretet / Kron vnd Scepter zu trach-  
ten / vñ die sampt vnser waren Religion / fried-  
recht / vnd Liberteten / zuuordrucken / Dann  
Gott weis / das wir vns an vnsern Fürstenthum-  
men / Landen / vnd Gebieten / die vns seine all-  
mechtigkeit vorliehen / gerne settigen vnd be-  
gnugen hetten lassen / Wunschen vnd  
bitten auch Gott / das wir dieselben zu seinem  
lobe / vnd zuerhaltung seiner Göttlichen ehrn /  
volkomlich vorsehen möchten.

Vnd das wir im widderspiel vns mehr  
befliessen / ime zu willen zusein / das gibt die  
bewilligte hülffe / die wir ime folgendes im wer-  
cke treulich geleistet / vnd darumb man vns itzt  
den danck gibt / zuerkennen / Er sol-  
te auch billich bedacht haben / dieweil er  
durch berürte vnser / widder Franckreich / gelei-  
stete hülffe / einen danckbarlichen wolgefelli-  
gen dienst / von vns empfangen vnd angeno-  
men / das sich / so durch alleine auch aller vn-  
wille odder vordries / so er gegen vns semplich  
oder sonderlich einichen geschepfft gehabt /  
anßerhalb obberürten sonderlichen mit vns  
auffgerichten vortregen gantzlich abgeschnit-  
ten.

Wir



Wir wissen inn gleichnis von keinen vor-  
messenen reden / dann wir haben von jme / wie  
wir mit rechtem grund vnd warheit besteten /  
vnd sagen mögen / vor dieser handlung alwe-  
gen / vnd jhe löblich vnd ehrlich geredt / vnd  
vor den Man nicht erkand / dauor wir jne nu-  
mehr erkennen.

Aber dieweil die sachen zu der vntrew /  
vnd vorgeessenheit seiner Pacten / geschwornen  
Obligation / vnd vorschreibungen kommen /  
So müssen vnd werden wir / auch reden / wie  
die sache an jr selbst ist.

Darzu wissen wir / von keinen lesterlich-  
en / schand / schmehe schrifften / vnd gemel-  
den / so inn vnsern Fürstenthumen / Landen /  
vnd gebieten / sein person betreffend / weder  
von vnsern Theologis / noch den vnsern aus-  
gangen / Sondern das widder Spiel / wir-  
det sich mit grunde erfinden / das vnser Theo-  
logi vnd Gelerten / allwegen von jme löblich vñ  
ehrlich gehalten / das Volck inn jren predigten /  
darauff gar vleissig gezogen / auch auff das ge-  
bet vor jne / das jme Gott der allmechtige zu-  
vorwaltung / seins Ampts gnade geben wolte /  
ermanet vnd gewiesen / Ob aber vnser Theo-  
logi vnd Gelerten / etwas aus Christlichem Eif-  
fer zu der Religion / widder die misbrenche des



Babsts vñ seiner vngöttlichen Eere hetten ans-  
gehen lassen / Solchs haben wir jnen nicht ge-  
wust zu wehren.

Wie aber Cocleus / Dadamaricus / vnd  
der Carmelit zu Cöln / Vns vnd vnserer Mitvor-  
wandten Eere / dergleichen auch vnserer Theo-  
logen / eben so beschwerlich angegriffen / Ja  
auch vnter dem Gespräch zu Regenspurg / da-  
von vorgleichung / der Religion gehandelt solt  
worden sein / Das ist offenbar.

Vnd wie er sich in diesem gantzen druck /  
seiner vormeinten Aechtserklärung / mit beson-  
derm ertichtem vorsatz / doch mit vngrunde be-  
fleissigt / vns genug zu vorunglimpffen / vnd  
vorhasset zumachen / Also thut er auch / inn  
dem / das er vormessentlich vnd betrieglich vor-  
gibt / das wir nicht vnterlassen / vnsern pflich-  
ten / vnd Nyden zuwidder / nicht allein / aller-  
ley Pacta / Bund / Conspiration vnd andere  
menterey / gegen jme zuerregen / Sondern jne  
daneben bey frembden Potentaten zum heff-  
tigsten einzubilden.

Nun wissen wir von keinen Pactis / Con-  
spiration vnd Menterey / Vns solte auch / als  
von Ehrliebenden / Churfursten vnd Fürsten  
Deutscher art / vnd geblüts / geboren / trewlich  
leid



leid sein / das wir mit vorweislichen vnd heimlichen practicken / Conspiration vnd Mentereisen / wie leider gegen Vns vnd vnsern Mitvorwandten / in viel wege bescheen / vñ sich itzt mit dem wercke am tage befindet / vmbgangen weren / Seind aber nicht in abreden / das wir vñ vnser Mitvorwandten / ein Christliche einung vñ vorstentnis / zu entschüttung vnbillichs gewalts / auch zu beschirmung Vnser vnd vnserer Unterthanen / Land vñ Leute / Defensiu auffgericht / wie wir des auch / vormöge aller Recht zuthuen befüget gewest / Aus was vorursachung wir auch / zu derselben bewegt worden sein / das ist inn vnserm negst ausgegangenen auffschreiben / angezeigt.

So hat auch der Grannel / wider vns / den Landgrauen / vnd vnsern alten Cantzler seligen / zu Regenspurg gesagt / das damaln der Kayser mit vorgemelter Bundnis wol zufrieden / dieweil wir dozumal seiner partey waren / vnd ihem mehr wir Leute zu Vns zögen / ihes beser es wehre / Vnd sie möchten leiden / das wir alle Reichsstete zu vns zögen.

Ferner / so schemet er sich nicht / vns mit vorborgenen Worten zu zumessen / als ob etzliche vnsern guten willen vñ neigung / jegen der Deutschen Nation / dieselbe des Türcken halben in gefahr /



gefahr / vnd forge zusetzen genugsamlich zu  
sagen wissen solten / Wiewol nun solche  
einführung / so vnlanter / das wir nicht vorste-  
hen können / ob es Welsch odder Deudsch sey /  
So ist doch aller Welt bewußt / kund vnd offen-  
bar / wie wir / gegen dem Türcken jeder zeit ge-  
holffen / vnd vnser vormögen weiter vnd mehr /  
dann vnser Voreltern ihe gethan / getrewlich  
furgestreckt haben / auch inn fellen / do wir  
dieselbe hülffe / one erlebidge / notwendige Con-  
dition / nicht bewilligen mögen / die wir aber  
gleichwol geleistet / vnd doch vom gegenteil  
bewilligt / vñ gleichwol nicht geleistet worden.

Darumb sagen wir / Wer vns dieser han-  
delung vnd practicke / mit dem Türcken beschüt-  
digt / das derselbe vns damit antichte / vnd sol-  
chs mit betrug! / falsch / vnd mit keiner war-  
heit / von vns rede.

Es ist vns aber vor guter zeit durch stad-  
liche vnd treffliche kundschafft angelangt / das  
der genant Kayser / vnd König / mit dem Tür-  
cken / inn solcher practick stünden / denselben  
vber die Deudsche Nation zufüren / der gestalt  
das er alleine Vns vnd vnser Mitvorwandten /  
angreiffen / beschedigen / vorderben / vnd die  
anhenger des Bapsthumbs vorschonen solte.

Vielmehr



Vielmehr aber gibt seine handlung vnd  
anstand mit dem Türcken / den er mit solcher  
grosser mühe erlangt / sein gemüt zuerkennen /  
dann wiewol ime Churfürsten / Fürsten / vnd  
Stende des Reichs / eine stadliche hülfte be-  
willigt / Als etzliche den gemeinen pfennig /  
andere aber sonst / nach irem vormögen / so hat  
er doch denselben anstand / one vorwissen der  
Stende des Reichs gemacht / vnd diesen sei-  
nen itzigen Krieg / darauff angefangen / do er  
doch auff jungstem Reichstage zu Speir zuge-  
sagt / vnd vorheissen / nach endung des Kriegs  
widder Franckreich / eigener person widder den  
Türcken inn Ungern zuziehen / Darumb  
hieraus wol zuvorstehen / das ime viel mehr  
an dem gelegen ist / die Lutherischen / wie er sie  
nennet / zu dempffen / vnd Deudsch Nation  
zuordnung / dann dem Türcken zu wehren /  
aus ursachen / ob wol der Türcke / wie die Zeit-  
tungen lauten / mit einer grossen macht inn Un-  
gern ankommen / vnd an einem orte mit einem  
andern hauffen eine treffliche grosse anzal  
Christenlichs Volcks hinweg gefurt / So  
hab man doch das Geschutze von Wien herau-  
ffer gehen / vnd one allen widerstand das ar-  
me Christliche Volck / von dem Türcken vnchri-  
stlicher weise / lassen vortreiben / vorheeren /  
vnd hinweg führen.

Der Keyser lest den G Vnd  
Keysern mit wylig dy Christen  
• nach Keyseren



Vnd wirdet also die macht / so man zu  
Kettung viel vnschuldigs Christlichs bluts / zu  
widderstand / des Türcken brauchen solte /  
auff vns gewendet / Daraus auch klerlich zu  
vorstehen ist / das er vnd sein anhang / Vns  
vnd vnser Mituorwandten / erger dann vor  
Türcken halten / die zu vor vortrieben / vmb  
gebracht / vnd ausgerottet werden müssen.

Mit vorberurter vnser bestendigen / ge  
grundeten / vnd warhafften entschuldigung /  
aller vorbemelter ertichter / vnbewehrlicher /  
vnwarhaffter / zulegung vnd bezichts / wollen  
wir auch den Epilogum seins drucks vorant  
wortet haben.

Vnd hat daraus / ein jedes Erbars vnd  
vorstendigs gemüt / klar vnd lauter abzun  
men / das er vns mit obgemelter falschen  
bezeichnung / keins vnghehorsams / Land  
friedbruchs / des lasters der beleidigten Ma  
iestat / antastung der Kayserlichen Doch  
heit / Gewalts noch Auffrur / Kriegs /  
Conspiration / Menterey / mit billigkeit mag  
beschuldigen / viel weniger fuge gehabt /  
vns inn des Reichs Acht / vnd Oberacht /  
odder inn die Peen / straffen vnd bussen /  
inn



inn seinem Druck begriffen / zu kennen / zu er-  
klaren / vnd vorzünden.

Sonder ist vielmehr offenbar / vnd vn-  
widdersprechlich / Wie dann auch des Pabsts  
Brieff / an die dreyzehen orter inn Schweitz  
geschriben / furnemlich aber die Bundnis mit  
dem Pabst auffgericht / so zu ende dieses ans-  
schreibens angehengt / also klar an tag gibt /  
das es nicht offenbarere könte furbracht wer-  
den / das Er / vnd der Pabst / vnter dem schein  
eins gesuchten vnd vormeinten vngehorsams /  
mit diesem zumor / langebedachtem Kriege / die  
entliche ausrottung vnd vordruckung vnserer  
wahren Christlichen Religion / auch aller Be-  
kennner derselben / vnd widerbrennung / des  
geraubten gehorsams / des Römischen Stuls  
( wie sie dauon schreiben ) dergleichen die Löß-  
liche / langhergebrachte Libertet vnd Freyheit  
des Vaterlandes / gantzlich suchet vnd mei-  
net.

Vnd wie er also eine Monarchi / do-  
mit er lange zeit vmbgangen / erlangen vnd  
erhalten möchte / dadurch die Lößliche Deut-  
sche Nation / inn eine Hispanische Seruitut  
zu bringen.



Gesetzt aber doch vngestanden / das die  
obbemelte / vmbstendige zlagen / sich im grunde  
der warheit also erhielten / wie es doch  
nimmermehr beybracht odder erweisert werden  
mag / So hette jme doch viel mehr gebürt /  
do er etwas widder vns strefflichs gehabt (wie  
bey andern Kaysern vnd Königen löblich her  
kommen) vns surzufordern / zubeschuldigen /  
vnd also rechtlich / vnd nicht mit eiteler that /  
one vorgehende / vorhöre / vñ erkenntnis / gegen  
vns zuhandeln / Zu dem / das es auch widder  
recht / des Weilligen Reichs Ordenungen / vnd  
dazu widder die Franckfurdische geschworne  
Obligation / von jme vnterstanden vnd surge  
nommen / Welchs bey vorigen Kay  
sern vnd Königen / nicht also herkommen / jme  
auch nicht gebürt / one vorgehende vorhöre /  
vnd one beywesen Churfürsten / vnd Fürsten /  
solche nichtige echtigung zuthun / odder aus  
gehen zulassen.

Vnd ist aus obangezeigten vrsachen w or  
zugleiben / das er sein surnemen sur lengst / g er  
ne ins werck gebracht hette / Das er s über  
zur vrsachen des vorzugs surwendet / wie e r vns  
ser vorschont / vnd vns nicht mit gering er bes  
schwerung vñ vorserung / seins gewissens nach  
gesehen / Das würdet sich aus vorange eigtem  
vnserm vorbringen / auch der lenffte / vr absten  
de /



de/vnd gelegenheit viel anders finden/ Nennlich/das er anderer seiner eignen nützigen geschäfte vnd sachen halben / zu volnziehung dieses lange zuuor bedachten Kriegs / die rechte zeit vnd gelegenheit nicht hat haben mügen.

Es kan aber menniglich / aus der grossen vnerhorten Tyranny / damit er viel arme / fromme Christen / in Nidderlanden verfolget / solch sein gewissen / vnd furnemen leichtlich vrteilen / vnd daneben auch wol mercken vnd vorstehen / das er solch sein furnemen / nicht vmb der schuld ein vrsach / noch vmb der vbermessigen gedult / gnade / vnd güte / willen / die er einfüret / Sondern von wegen seins eignen nutztes / vnd damit er seine gelegenheit / bey dem Hertzen zu Gailich / Cleue / vnd Berge / vnd hernach bey dem Könige von Franckreich / desto vnuorhinderter schaffen / ausrichten vnd volnbringen / auch einen anstand mit dem Türcken machen möchte / angestellet vnd vorzogen.

Vnd eben diese vrsachen haben die vortrege / so er mit Vns / dem Landgrauen / Anno 41. zu Regenspurg / Vnd mit Vns / dem Churfürsten zu Sachssen / Anno 44. zu Speyr auffgericht / wie wir nun wol vorstehen können / auch vourrsacht.



So haben wir vns auch der vntrew /  
geschwinden practicken vnd dieses Kriegs / so  
viel dester weniger zuorsehen gehabt / Dies  
weil er Vns / den Landgrauen vnter seinem  
Zuge / nach Regenspurg / zu sich jegen Speir  
erfordert / sich sonderlichs gnedigs gemüts /  
gegen vns angenommen / vnsern Rad / wie  
die sachen auff künfftigem Reichstage / zu  
Friede vnd Ruhe / des Reichs zurichten / ge=  
fordert / Auch daneben begert / das wir  
vnser Colloquenten vnd Auditores / auff  
sein erfordern / widderumb zu dem Gespräch  
nach Regenspurg schicken wolten / mit an=  
gehengter dancksagung / das wir vns also  
mit ihrer Maiestat Kethen / den von Gran=  
nehl vnd Naues / inn beysein des Pfaltz=  
grauen / vnd seiner Kethe / auch der Wirt=  
tenbergischen Gesandten / inn handlung be=  
geben / vnd auch mit dieser fernern anzeige /  
er wolte es Vns / wenn wir eigener Person  
auff den Reichstag kommen solten / zeitlich  
genug zuerkennen geben.

Vnd hat der von Naues / bey vnserm /  
des Landgrauen Cantzler / sonderlich ange=  
halten / er solte die vorsehung bey Vns thu=  
en / damit die dinge / so sein Verre / der Kay=  
ser /



fer / also mit Vns gehandelt / dem jegenteil  
nicht fürkemen / dann es möchte ime sonst /  
darauff bey demselben allerley beschwerlicher  
vorweis stehen.

Vnd wie sein intent principaliter / inn  
aller seiner beschuldigung darauff stehet / vns  
mit diesen seinen getichten / vorhasset zuma-  
chen / trennung vnd sonderung zuerwecken /  
Also bestreiffet er sich auch desselben inn dem /  
das er furgibt / das von vns nichts / dann  
vnrechtmessiger gewalt / Tyranny / Placke-  
rey / vnd zerstörung aller Policey / zuerwar-  
ten / So er Vns doch / darmit gewalt  
vnd vnrecht thut / vnd die dinge vielmehr  
bey ime zubefinden sein / Dann was  
wir zu straff der Plackereyen jedesmals fur-  
genommen / ist offenbar / Vnd bey etz-  
lichen nicht die wenigste ursach / ihrer vn-  
gunst / vnd vnwillens jegen Vns / das  
wir solche tedliche / vnehrliche / vnd Land-  
friedbrüchige handlungen / nicht haben leis-  
den / noch denselben zusehen wollen /  
Wie sich der genante Kayser aber darinnen  
gehalten / vnnd wie ernstlich er zu abstel-  
lung derselben gehandelt / das ist am ta-  
ge /



tage / vnd sonderlich den Erbaren Steten wol-  
bewust.

Welchermassen er auch vber so vieler /  
Churfursten / Fürsten / vnd Stende ansuch-  
en / den vorgemelten gewolichen vnd vnerhor-  
ten Mord / an dem frommen Diastio / vnser  
vnd vnser Mitvorwandten / bekanten wahren  
Christlichen Religion halben / begangen / vn-  
gestrafft gelassen / wie er auch die Process zu  
Insbruck / viel mehr gestopfft / auffgehalten /  
Auch was gestalt man widder gemelts Dia-  
stij Bruder / Morder vnd Todschleger / Kö-  
nig Ferdinandum zu offnung vnd forde-  
rung / solchs rechten bringen mögen / Davon  
weis man guten bericht zuthuen.

Dis ist vnser warhafftige / gegrund-  
te / vnd beständige vorantwortung / aller der  
vormeinten / nichtigen / vnd vnbewehrlich-  
en vrsachen / so Karl / der sich einen Kayser  
nennet / Inn seinem itzigen Drucke / widder  
Vns / hat offentlich ausgehen lassen / die  
wir dann auch mit warheit / vnd wie zu re-  
cht genug darzuthun / vnd zubeweisen wis-  
sen.



Vnd wollen hierauff inn allen oberzettelten  
fellen (die Religion ausgeschieden) vor allen vn  
partheischen Christlichen Potentaten / auch  
Churfürsten / Fürsten vnd Stenden des Reichs /  
dergleichen der gantzen Deutschen Nation / vnd  
allen frommen vnd ehrliebenden / re-  
de / vnd antwort geben.

Vnd hat mentiglich hieraus zusehen vnd  
abzunemen / wie vngegründet vnd vnberwerlich  
seine vormeinte nichtige vrsachen bestehen / das  
durch er einen vnbillichen vñ vnbesüßten Krieg /  
des vormeinten vnghehorsams halben / für-  
nimpt.

Vnd das ime nicht gebürt hat / vns / als  
Gott lob / vñ sonder rhum / ehrliche vnbeschol-  
tene Churfürsten / vnd Fürsten des Heiligen  
Reichs / Deutscher Nation / vnd aus alten vnd  
löblichen / Churfürstlichen vnd Fürstlichen  
Häusern vnd Stämmen geboren / vnd herko-  
men / Auch dem gesagten Kayser / von gebürt  
ebenbürtig / vngesordert vnd vngehortet vnser  
antwort / Defension vnd schutzwehre / vñ son-  
derlich vmb so gros wichtige / ertichte auff las-  
gen vnd sachen / inn seine vormeinte Recht zuer-  
klaren / vñ vns vnserer leibe / Ehren / Standes /  
Würden / Lande vnd Leute zu entsetzen / vnd zu  
Priuiren / Das lassen wir die Recht vnd dersel-  
ben



ben furnemste ansleger / auch alle vnsparthey's  
ische / vornünfftige rechtsgelerten vnd vorsteh-  
digen / besagen vnd vrteilen.

Dann so einem Römischen Kayser gebür-  
ren sollte / mit einem Churfürsten / Fürsten oder  
Standte des Reichs / zuuoran in solchen treff-  
lichen / beschwerlichen / vnd wichtigen sachen /  
also vnuorhort vnd vngesordert / zufaren / wie  
sich dieser Karl / vormeinter Keiser / gegen Vns  
vnterstanden / So hette es der hochvornünff-  
tigen Constitucion / Kayser Heinrichs / des sie-  
benden / Nemlich wie in sachen vorletzter Ma-  
iestat / oder in Crimine lese Maiestatis / vnd Re-  
bellionis / Procedirt sol werden / nicht bedürfft /  
welche doch mit trefflichem hohem rad / da-  
rumb gemacht / das sie sampt andern des Rei-  
chs Rechten / von Römischen Kaysern vnd me-  
niglich gehalten / vnd derselben sol nach gegang-  
en werden.

Vnd ob er gleich sagen wolte / er were der  
Rechte satzungen nicht vnterworffen / So  
kan er doch / vnd niemands / dis mit grunde vñ  
warheit widerlegen / Das ein Römischer Kay-  
ser den Rechtē / nicht so weit vnterworffen sollte  
sein / als dieselben in Göttlichen / natürlichen vñ  
der Völkter Rechten gegründet / Wie dan Kays-  
ser Heinrichs Constitucion dieser puncten hal-  
ben / sonderlich / in jtz gemeltem Rechten gewis  
demby



Sembt ist / Nemlich / das der so vmb solche sa-  
chen beschuldigt / in allwege Citirt / erfordert /  
vnd seine antwort Defension / vnd schutzwehre  
gehört / vnd was nicht gestanden durch recht-  
messige beweisung ausgeführt / ehe dann er da-  
rumb Condemnirt / oder gestrafft / solle werde.

Vnd das die erforderung vnd Citation /  
auch das des beschuldigten antwort / vnd De-  
fension gehört / vnd nicht durch blosser Narrat-  
tion eins Kayfers / Sondern durch gebürliche  
anzahl lebendiger gezeugen / oder mit glaubwir-  
würdigen / schriftlichen vrkunden / welche nach  
gelegenheit der beschuldigten Personē / stands /  
vnd der sachen grosichtigkeit / klerer dann die  
Sonne am hellen mittage / vberweist sol wer-  
den / aus Göttlichen / natürlichen vnd der Völ-  
cker Rechten / herfleust / vnd derhalben in eins  
Kayfers macht vnd gewalt nicht ist / darwid-  
der einiche krefftige oder beständige schaffun-  
ge / zuthuen / Solchs vormag wedder er / der  
genant Kayser Karl / noch jemandis mit war-  
hafftigen / vornünftigen grunde / zuwiderspre-  
chen.

Vnd zu dem / das ein jeder Kayser nach be-  
schehener wahl / dem Reich einen Eid schwe-  
ret / desselben Rechte vestiglich zuhalten / inma-  
ssen dann der Kayser / solche vnd andere des  
Reichs Rechte zuhalten / auch geschworen /

D u So

Der Kayser schweuret einen  
Eid vnd Gelt an vns



So ist er doch darüber soniel mehr schuldig ge  
west vns nicht zuorgewaltigen / Sondern wo  
er zu vns vormeint hette / zusprechen / solchs zu  
vorhöre vnd gebürlichen Rechten zustellen / vnd  
kommen zulassen / Vns auch vnuorhört /  
vnd one vorgehenden ordentlichen Process / in  
die Acht / vnd Oberacht / inn keinem wege zuer  
klaren / Die weil er solchs zuhalten  
durch den offtberurten / Franckfurdischen  
Contract / darinnen gemelte vnd andere mehr  
Pacta vnd Condition / vorleibet / mit Brieffen  
vnd Siegeln bewilligt vnd Confirmirt / vñ mit  
seinem leiblichen Eyde / vnuorbrüchlich zuhal  
ten geschworn.

Vnd das ein Kayser seine Contracten vñ  
Pacta / vnd inn sonderheit / do die one das inn  
natürlicher gerechtigkeit / Justitz / vñ billig  
keit / gegründet / wie vorberürte Franckfurd  
sche Pacta / der Citacion / Defension / vnd re  
chtlichen Processen halben / darinne vnuider  
sprechlich gegründet sein / ob er die gleich ferner  
nicht geschworen hette / destemehr / do er die  
mit leiblichen Eyde bekräftigt hat / wie genan  
ter gesagter Kayser gethan / zuhalten schuldig /  
vnd darwidder krefftiglich / bestendiglich vnd  
valide / nichts schaffen kan / Sondern sei  
ne widderige gescheffte / gantz nichtig vnd vn  
bündig sein / vnd dafür von meniglich gehalten  
müssen



müssen werden / Des wollen wir vns inn gleich  
nis auch / auff die Recht gezogen haben.

Man lieset vom Aristotele / des grossen  
Monarchen Alexandri Preceptorn / ob er wol  
ein Weide gewesen / das er jne gelernet / vnd jme  
geraten / Er solte seine zusagen / vortrege / vnd  
Contracten / ob er wol ein mechtiger Herre we-  
re / vestiglichen halten / Sonst wurden seine  
sachen keinen guten ausgang haben etc. Sol-  
che genants Weiden / vormanung / solt jme der  
Kayser bisher auch nicht vnbillich haben lassen  
zugemüte gehen / dan hin vnd wider foedera vñ  
Contracten zumachen / vñ dieselben nach erlang-  
ter Commoditet / nicht zuhalten / wie in vielwe-  
ge bisher von ihme beschehen / wirdet gewis-  
lich zu letzt auch nicht wol hinaus gehen.

So wil Gott trewe / glauben / vnd Lyde gehal-  
ten / vnd seinen Göttlichen Namen vnuoracht  
haben / Wie ernstlich er auch / den trewe  
odder eidbruch / von anbegin der Welt / bisher  
gestrafft hat / zeigen beyde Biblische vnd Dei-  
denische Historien genugsam an.

Vnd so ein Kayser seine Contract vnd  
Pacta / zuhaltē nicht vorpflcht solt sein / vñ son-  
derlich die er geschworen / so muste seiner Kay-  
serlichen macht / vollommenheit nach gegeben  
werden / das er recht hette Gott vñ Menschen /

D iij zubetris



zubetriegen / vnd wider Gottes Gebot / vnd selb-  
ne geschworne Eyde / auch wider natürliche vñ  
der Völder Rechte / daraus die Obligation her-  
flusst / zu handeln / welchs doch zusagen eine of-  
fentliche vnuorschempte vnwarheit were.

Derweil dan vielberurte des Kayfers Fran-  
ckfurdische geschworne Pacta / welche mit sei-  
nen Brieff vnd Siegeln / so offte es not darzu-  
thun / vnd das er dieselben / gegen Vns vnd vn-  
sern Mitvorwandten nicht gehalten / Notorij /  
vnd kundbare ding sein / Vnd dann keine Oblis-  
gation den andern teil verbunden halten mag /  
do jme gebrochen. So ist hieraus klar /  
das er wider seine Kayserliche gegenpflicht / mit  
solcher vortbrechung gehandelt / vnd Wir vnd  
vnser Mitvorwandten / widerumb nicht Ob-  
ligirt noch schuldig sein / ihne vor einen Kayser /  
wie hienor mehrmals auch angezeigt / zuerken-  
nen / Nach dem er gegen Vns vnd vnsern Mit-  
vorwandten das nicht gehalten / darauff wir  
jme ein mal vnd anders nicht / vor einen Kayser  
angenommen gehabt.

Vnd hierwidder hilfft vnd thut nichts /  
das er berurte vbersarung / Gottlicher / natürli-  
cher / vnd der Volcker / auch vornunfftiger be-  
schriebener Recht / vnd seiner geschwornen  
Contracten vnd Pacten / zu ende seins drucks  
vor



vormeint hat / mit den Clausulen / Nemblich /  
aus Kay. May. macht vollkommenheit / mit rech-  
ter wissen / vnd aus eigener bewegnis etc. zu-  
slicken / vnd zuersetzen.

Dann sie gelten / besage aller Recht / ni-  
chts widder seine Pacta vnd Contracten / wel-  
che er / wie ein jeder vnd quilibet zuhalten schäl-  
dig ist / Vnd sonderlich / dieweil er die bey  
dem namen der allerhöchsten / Göttlichen Ma-  
iestat zuhalten / vnd dawidder inn keinerley  
weise zuthuen / geschworen / So ist  
auch one not alhie / dauon anzeignung zuthun /  
inn welchen fellen / vnd wes wirglichteit / eine  
jede derselben Clauseln / sonst zu recht sein  
mag / dann es thut zu diesem handel ni-  
chts.

Vnd nach dem Hieraus die vorberürte  
nullitet vnd nichtigkeit / seiner vormeinten  
Achtserklerung / auch vnterstandener Pri-  
uirung / sampt der Absoluirung vnser Lehen-  
leute vnd vnterthanen / von ihren pflich-  
ten etc. klar erscheint / vnd dieselbe nullitet zu  
recht Notaria ist. So wirdet sich vngeweiffelt  
niemand anmassen / vns darauff vor geechtig-  
ten zu halten / Aber widder Vns / vnser Land  
vnd Lente / als den beschriebenen Rechten /  
vnd



vnd des Heiligen Reichs Landfrieden zuwid-  
der / zuhandeln / Diweill solche nichtige  
vnd vnbundige Acht / nicht mehr ist / noch zu  
recht wircken kan / dann keine Acht.

So haben wir auch zu vnser beyderseits  
Lehenleuten / vnd vnterthanen dis gnedige vnd  
vngeweiffelt vortrawen / ein jeder werde seine  
ehre vnd pflichte / so er vns gethan / als ein ge-  
trewer vnd gehorsamer / bedencken / vnd sich zu  
der vntrew / wie der vormeinte Keiser / im schein  
vielberürter seiner nichtigen Achtserklerung /  
gerne sehe vñ wolte / gar nicht bewegen lassen /  
Sondern die schwere Peenen des meinelides  
vnd andere straffen / der Aecht betrachten.

Vnd nach dem droben berurt / das der  
Kaysen alle betrübung / vorhinderung der Kei-  
chs hendel vnd des Rechten / auch allen mis-  
trawen durch sein Wormbser Edict selbst ge-  
pflantz / wie er dann auch dasselbe bis auff den  
hentlichen tag / ob wol Wir vnd vnser Mitvor-  
wandten vielmals / darumb gantz vnterthenig-  
lich angesucht / niemaln hat wollen Cassiren  
odder auffheben / Solchs ist die warheit.

Dann was er bey dem Pebstischen anhang /  
domit vor einen trotz / vnd hart mütigkeit / vns  
dieses teils zuwidder erweckt / das sie seind der  
zeit nur one vnterlas / darauff getrachtet / wie  
sie



ſie vns möchten vordrucken / vñ vber vns ihres  
gefallens hergehen / das geben Hertzog Hein-  
richs von Braunschweig / vnterstandene hen-  
del klar genug / Wir wollen etzlicher vorstorbes  
nen geschweigen.

Vnd welcher gestalt / genanter von Braun-  
schweig / vnd andere / lange vor dem Reichs-  
tage zu Augspurg / beschwerliche Bündnis zu  
vnser / vnd vnser Lande vnd Leute / vnd vnter-  
thanen / vortreiben / miteinander gemacht / vnd  
ehe dann Wir vnd vnser Witwvrandten / vns-  
ere Schmalkaldische Christliche Defensiff  
vorstandnis auffgericht / Darzu vns / dann  
der gesagte Kayser / mit seinem hochdrenli-  
chem vnd geschwinden / Augspurgischen ge-  
gebenen Abschiede / das er gut vnd blut / Kö-  
nigreiche / Lande vnd Leute / widder vns zu-  
setzen wolte / furnemlich gedrungen / Das ist  
auch wol wissentlich.

So hat man Vns auch / vnd vnser Rea-  
ligionsvrandten / auff den Reichstegen seind  
dem offberurten Edict / vnter andern gepla-  
get / Vnd Vns weren wollen / speise zugenie-  
ssen / die Gott mit dancksagung one vntersch-  
ted / zeit vnd tage / zugebrauchen / frey gelas-  
sen / Allein darumb das der Babst / als der Ana-  
tichrist / durch seine Teuffels leren / vnd satz-  
ungen



ungen widder Gottes Ordnung/ darinne vor-  
bot gemacht.

Dieruber hat man vns auch nicht wol-  
len vorgönnen/ Gottes Wort vnd sein Dailigs  
Euangelium / inn Kirchen zuvorkündigen las-  
sen.

Auffm Reichstage zu Augsburg/ do wir  
eine Kirche/ vor des Kayfers ankunfft daselb-  
sten/ erlangt hatten/ Begerte er/ das keine Pre-  
dicanten predigen solten/ dann die er würde vor-  
ordnen lassen / welche das heilig Euangelium  
lauter vñ reine one gezencke predigen solten/ Da-  
rinne wir im auff gutem vortrawen/ auch gefol-  
get. Aber was er vor Gottlose/ vngeschickte/  
vnuorschemete Buben/ vor Predicanten auff-  
stellen lies / das ist nicht heimlich.

Vnd wiewol es bey den Deudschen Kay-  
fern / abwege also gehalten / vnd herkommen /  
So ein Churfürst odder Fürst / auff eins Kay-  
fers beschreiben / einen Reichstag persönlich  
besucht / vnd den Kayser vmb erleubnis wid-  
der abzureisen begrüßet / das er darüber / dan-  
was mit sonderlichem guten willen bey ime  
erlangt / nicht auffgehalten ist worden. So  
hat doch Karl/ der genante Keiser/ vnserm des  
Churfür-



Churfürsten Herrn Vatern / seligen / vber ge-  
geben gleite nicht erleben wollen / Sein  
lieb ist auch / mehr dann einst / glaublich vor-  
warnt worden / wo sie würden abreisen wol-  
len / So were bestalt / das man sie nicht  
hinweg / noch aus der Stad Augspurg kom-  
men lassen solte.

Vnd zu andern gefehrlichkeiten / so da-  
selbst furgewest / So ist nicht gar lange /  
das aus Welschen Landen geschriben wor-  
den / wie ein Spanischer Bischoff / dem Kay-  
ser zu Augspurg geraten solt haben / das er vns  
zu sich bescheiden / vnd als dann Töden /  
vnd juguliren / vnd die Körper zum fenster hie-  
nans werffen lassen solte / Als dann würden  
die andern / so vnser Confession anhengig /  
dauon wol abstehen / vnd vnser bekante Lere  
nicht weiter einbrechen.

Ferner hat das Wormser Edict / vnd des  
Kayfers Bebstischer Abschied / denn er mehr  
berurts ortz / zu Augspurg gemacht / vorur-  
sacht die zerrüttung / des rechten am Cham-  
mergerichte / Inn dem das er Vns vnd vn-  
sern Confession Vorwandten / die / mit bese-  
tzung desselben Chammergerichts / So  
Vns / doch der Chammergerichts ordenung



nach mit gebürt / dadurch genommen / Nach  
dem inhalts desselben Abschieds / keine andere  
Personen / dann Christlicher Religion / daran  
vorordent solten werden / Daraus vnser Re-  
cusation / danon hienor genugsam erklerung be-  
schehen / so er vns nun gerne vor eine vorhin-  
derung des Rechten / auff legen wolte / erfol-  
get ist.

Zu dem das er auch / gegen vnser des Chur-  
fürsten zu Sachsen Vettern / Hertzog Friede-  
richs Churfürsten etc. erzeigten wolthat / vn-  
sern herrn Vatern / seligen bis inn seinen tod /  
mit der Chüre zu Sachsen / nie belehnen wol-  
te / Allein der Religion halben / auff das Worm-  
ser Edict / wie er S. L. zu Augspurg durch  
Graff Heinrichen von Nassaw / vnd ertzliche  
andere seine Kethe anzeigen lies.

Datt auch aldo mit den andern Chur-  
fürsten / von seins brudern König Ferdinand  
Walhe Practicirt / vñ dieselbe widder die gülti-  
ge Bulle fürzunehmen / beschlossen / vnd genan-  
ten vnsern Herrn Vatern / danon gentslich aus-  
gesondert / das nun gedachter vnser Herr Va-  
ter vnd Wir / mit soleher des Kayfers gewalt-  
barn vñ treubruchigen handlungen / wol sol-  
ten zufrieden gewest sein / Vnd vnser rechtliche  
notturfft vnd Opposition dawidder zuthun /  
vnterlassen.



vnterlassen haben / das hat er selbst wolzermessen / Wie es S. L. vnd vns zuthuen gewest.

Vnd wiewol wir beide / aus solchen erzählten gefehrlichen beschwerungen / vnd der gleichen mehr / genugsame vrsachen gehabt heten / bey des Kayfers leben / keinen Reichstag persönlich weiter zubesuchen / odder auch zubeschicken. Vnd sonderlich Wir / der Churfürst / dierweil König Ferdinand / viel Reichstege an stad / vnd auff beuehl des Kayfers / darnach vorwalte / welchen wir vor einen Römischen König mit Reuerentz vnd Titel / eins Römischen Königs zuerkennen nicht schuldig gewest / So haben Wir dannoch beide / hieran nicht mangel sein lassen / allein hiernumb / damit vns ihe keine vorhinderung / der Reichshendel noch des Türcken widderstands halben mit warheit / solt mögen auffgelegt werden / Darumb vns auch ein jeder erbars gemüts vnd vorstands / söviel mehr des Kayfers aufflegen / das wir die Reichshendel vorhindert solten haben / wirdet wissen entschuldig zuhalten.

Endlich ist aus diesem allem klar / das der vermeinte Kayser / meinet vnd vorhat / vnter demschein / seins ertichtten vngehorsams / die wahre Christliche Religion / die er Lutherisch nennet / zuuorfolgen / zuuortilgen / vnd entlich auszurotten. Vnd



Vnd das er vnd der Babst / diesen Krieg  
wider die Protestirenden / vnd die / so wider das  
vormeinte partheilich Concilium Protestirt ha-  
ben / auch widder die / so mit vns in einung ste-  
hen / vnd alle die / welche ( wie sie es nennen ) in  
diesen misbrenchen / vnd irthumb sein / alleine  
auff den fürsatz angericht vnd furgenommen /  
den etwan vbel vnd vnchristlich / geraubten ge-  
horsam / des Stuls zu Rome / dodurch widde-  
rumb zuerzwingen.

Es kan auch aus diesem allem / ein jeder  
Christ / vnd ehrliebender ermessen / das Wir /  
vnd vnser Mitvorwandten / Göttliche / Recht-  
messige / gegründte / vnd vberflüssige / vrsach ge-  
habt vnd haben / diesen vnsern genotdrengeten  
Defensiff Zug / furzunemen.

Dienstlich / vleissig / vnd freundlich / der  
halben bittend vnd gnediglich ersuchend / ein  
jeder wolle dem / so dawidder mit vngrunde /  
vnd betrug surgebracht / nicht glauben geben /  
Sondern vns also in der warheit entschuldigt  
halten / Vnd darauff / dieweil nunmehr of-  
fenbar am tage ligt / das dieser des Kaisers Kri-  
eg / die vordruckung der Religion / vñ des vater-  
Landes / Deudscher Nation / angehet / seine  
hülffe / beystand vnd vormögen / bey Vns / vnd  
vnser Mitvorwandten auffsetzen / Das  
wollen



wollen Wir / vmb einen jeden / wie sich seinem  
Standenach gebürt / freundlich vordienen /  
günstiglich beschulden / vnd inn  
gnaden vnd gutem erkennen.

Datum inn vnserm Feldlager vor Ingolstadt /  
den andern tag Septembris / Anno  
M. D. XLvj.

✱

✱

✱

## Psalmo CIX.

**G**ott mein Rhum / Schweige nicht.  
Denn sie haben jr Gottloses vnd  
falsches Maul widder mich auffge-  
than / Vnd reden widder mich / mit falscher  
Zungen.

Vnd sie reden giftig wider mich allent-  
halbten / Vnd streiten widder mich on vrsach.

Aber du H E R R / H E R R sey du  
mit mir / vmb deines Namens willen / Denn  
deine Gnade ist mein Trost / errette mich . . .



Des Babstes vnd  
Keiserlicher Maiestat Bündnis aus  
dem Latein ins Deudsch  
transferiert.

**A**ls sich dann das Deudsch  
Land genand Germania / nun  
viel verschienet Jar / in grossen  
jerrthumb vnd misglauben erfun-  
den / vnd nun etliche Jar darinnen verhar-  
ret / daraus zubeforgen / grosser schaden /  
verderbnis vnd zerstörung des Deudsch-  
lands / sich zutragen möchte / Vnd als man  
nun etliche zeit / allwegen solchem misglau-  
ben ein sarschung hat wollen thun / damit  
spenn vnd irrungen zuuermeiden / vnd das  
Deudschland in guter einigkeit zubehalten /  
hierauff ein offen vnd gemein Concilium zu  
Trient berufft vnd gehalten worden ist / da  
aber die Protestierenden / mit sampt dem  
Schmalkaldischen Bund / gered / das sie  
sich



sich nicht in ein solch Concilium ergeben / doch  
darein komen wolten / welches Concilium  
auff den dritten Sonntag im Aduent nechst  
verschienen / angangen / Darnach mit der  
Gnaden Gottes gehandelt / damit es ein  
sürgang nemen möcht.

**H**ierauff Beshstliche Heiligkeit vnd Keys  
serliche Mayestat / fur gut vnd fruchtbar  
angesehen / das sie miteinander diese nachgez  
schriebene Capitel vnd Artickel auffgericht  
vnd angenommen haben / vnd die gantz inn  
allen trewen / einander zu halten vnd nach  
zukomen / vnd das zu Eer vnd Lob Gott  
dem Allmechtigen / vnd zu guter einigkeit als  
ler meniglichem / in sonder dem Deudschen  
Land / so man Germaniam nennet.

**Z**um Ersten / das sein Keyser. May. /  
in dem Namen Gottes / vnd mit hülff vnd  
beystand Beshstlicher Heiligkeit / solle anfas  
hen / auff nechstkünfftigen Brachmonat sich  
zu rüsten / vnd sich mit Kriegsleutten / auch  
was zum Kriegen gehört / versehen / wider  
die / so wider das Concilium Protestiert  
haben /



haben / vnd wider den Schmalkaldischen  
Bund / auch wider alle die / so in diesem miß-  
glauben vnd irrthumb sein / im Deudschen  
land / vnd das mit allem seinem gewalt vnd  
macht / damit er sie widerumb bringe / in den  
alten / warhafften / vngeweißelten Glau-  
ben / vnd Gehorsam des Heiligen Stuls /  
Doch zwischen dieser zulauffenden zeit / soll  
sein Keyserliche Mayestat / allen möglichem  
vleiß vnd ernst ankern / ob er die widerspen-  
nigen / gützlich one Krieg / in dacht wider-  
rumb zu dem alten Glauben vnd Gehorsam  
des Heiligen Stuls bringen / Doch nichts  
destominder so soll Er sich rüsten / so in der  
obgemelten zeit / solchs in der gütlichkeit nicht  
gestillet möchte werden / Das alsdann sein  
Keyserliche Mayestat zu dem Krieg gerüst  
vnd gefertigt sey.

¶ Item / das sein Keyserliche Mayestat /  
kein Vertrag noch vberkommnis / mit denen /  
so wider das Concilium protestiert haben /  
oder mit dem Schmalkaldischen Bundt /  
noch mit keinem andern / so in diesem miß-  
glauben sind / annemen / noch auffrichten  
solle /



solle / das / so diesem Krieg / oder Glauben /  
der Heiligen Christlichen Kirchen widerig /  
oder derselben zu nachtheil reichen möchte /  
one erlaubnis vnd bewilligung Vebfflicher  
Heiligkeit / oder der Legaten des Heiligen  
Stuls.

¶ Item / das Vebffliche Heiligkeit schuldig  
vnd pflichtig sey / in Monats frist / nach bez  
stetigung dieser Capittel / zu Venedig / in gute  
gewar sam zuerlegen / Nemlich hundert tau  
sent Cronen / welche mit sampt den andern  
hundert tausent Cronen / so sein heiligkeit gen  
Angspurg gelegt hat / durch seiner Heiligkeit  
Regenten / auch zu dem Krieg verbraucht  
werden sollen / vnd sonst zu keiner andern  
sach / So aber der Krieg nicht ein fürgang  
neme / sonder gewend wärd / als dan möge  
sein Heiligkeit solche zwey mal hundert tau  
sent Cronen / widerumb zu ihren handen  
nemen.

¶ Item / das Vebffliche heiligkeit verpflicht  
sey / das er zwelff tausent Italianer zu Fus  
besolden soll / vnd fünff hundert ringe Pferd



in seinem Costen/ vnd die Sechs Monat zu  
diesem Krieg vnterhalten / vnd bey jne hab  
ben / einen seiner Legaten/ der sie Regier /  
vnd personlich bey jnen sey / sampt den vber  
rigen Hauptleuten/ So aber der Krieg vor  
Sechs Monaten geendet würde/ alsdann  
hat sein Heiligkeit so viel beuor.

¶ Item/ Vebstliche Heiligkeit hat auch ver  
williget/ das Keiserliche Maiestat solle vnd  
möge/ den halben teil aller Kirchen in Hispa  
nien/ einen Jars eingang oder nutzung eins  
nemen/ vnd solch gut zu dem Krieg verwen  
den / wie dan der Keyserlichen Mayestat/  
die Brieff/ oder Bullen/ worden sein / in ges  
meiner form / wie gebreuchlich/ solche Bul  
len zu geben.

¶ Item/ Vebstliche Heiligkeit/ hat auch ver  
williget/ das Keiserliche Maiestat solle vnd  
möge / für fünffmal hundert tausent Cro  
nen/ Rent/ Zins/ Giltten oder Lehen/ der  
Clöster in Hispanien/ verkauffen/ Vnd solch  
Gelt an diesen Krieg legen vnd brauchen /  
vnd sonst zu keinem andern nutz / jedoch mit  
diesem



diesem anhang / Das sein Keyserliche Maies-  
stat solle den Clöstern/denen er dann ire güt-  
ter/Zins/oder Lehen verkaufft / aus seiner  
Mayestat Zinsen/Lehen/oder Einkomen/  
so er hat / es sey/so man nent / Intrada/  
oder ander seiner gütter nützigungen / als viel  
dagegen versetzen in gelt/das sich dem ver-  
kaufften / vergleichen möge / Vnd darumb  
das sein Heiligkeit in vuerhorte sach ver-  
williget / So soll solch verbriefen der Clö-  
ster gütter verenderung / so inen ersetzt soll  
werden/geschehen / mit allen guten mitteln/  
vnd nach seiner Heiligkeit gefallen / vnd mit  
verwilligung seiner Commissarien / angese-  
hen/ das solchs viel antreffen ist.

**I**tem/so es sich begeben/oder zutrüg/das  
einiger Fürst / oder Herrschafft sich erhäbe/  
on besondere / billiche / Ehrliche/ursachen/  
vnd sich fürnemlich Vestliche Heiligkeit/  
vnd Keyserliche Mayestat / in diesem irem  
fürnemen vnterständen/ zu betrüben vnd  
zuuerhindern/ Das alsdann sein Heiligkeit  
vnd Keyserliche Mayestat/einer dem andern  
schuldig vnd verpflichtig seien/einander mit



allen mittlen beystand zuthun / nach allem  
vermögen / solche ver hinderung einhelliglich  
zu rechnen / damit sie an diesem irem gutem  
furnemen / nicht geirret noch gehindert wer  
den / welche verpflichtet / soll / alle dieweil im  
Krefftten steen / als lang dieser Krieg weret /  
vnd noch Sechs Monat darnach.

**I**tem / sie lassen auch jeden Christlichen  
Fürsten oder Herrschafft / sie seien Geistlich  
oder Weltlich des Deudschen Lands / vnd  
gemeiniglich allen andern Fürsten / Sten /  
den / vñ Communen / des Christlichen Glau  
bens / freye wahl / das sie zu jnen mögen im  
diese Bñdnis treten / vnd kommen / jeder  
nach seinem Stand vnd vermügen / Mit  
der beschwerd vnd eer / die dann darzu von  
nöten sein mag.

**I**tem / zu merer erleuterung vnd sicher  
heit / der obgeschriebnen Artickel / vnd Cap  
itel / so sollen sie angenommen / vnd bestetret /  
vnd durch das ganze Consistorium der  
Cardinel / auch durch sein Heiligkeit vnd  
Keiser. May. trewlich vnd freet / on alle ge  
uerde / gehalten werden. Item




¶ Item / alsdann im andern Capitel sich  
erlentert / das dieser Krieg / solle angefangen  
werden / durch Keyser. May. / auff anges  
henden Brachmonat / versteet sich in diesem  
Brachmonat / als man zalt nach Christi ge  
burt / Tausent Fünff hundert vnd Sechs  
vnd Vierzig Jar / Dann diese Capitel sein  
wol vor langst geschrieben / vnd sich des ver  
einbaret / Aber sie seind erst zu Rom vnter  
schrieben / durch Beshliche Heiligkeit / auff  
den Sechsvndzwenzigsten tag des Brach  
monats / Tausent Fünff hundert vnd sechs  
vnd vierzigst / in beywesen des Hochwird  
igsten Herrn / des Cardinals von Trient /  
vnd des Herrn Don. Sien. de Ubna / Keis  
erlicher Mayestat Rath / Legaten / vnd  
Sandbotten.

Actum vnd beschlossen  
zu Rom / Den XXVI  
Brachmonats. Anno. 26.  
XLVI, Wie oblauff.



Handwritten text, likely bleed-through from the reverse side of the page. The text is mirrored and difficult to decipher due to its orientation and fading.



Handwritten text at the bottom of the page, possibly a date or a reference number. The text is mirrored and includes the Roman numeral 'XLIX'.